


高僧傳三集



BL
1460
T73
1887
v.4

高僧傳三集卷第十二

宋左街天壽寺通慧大師賜紫沙門贊寧等

奉敕撰

習禪篇第三之五

正傳二十人
附見四人

唐杭州大慈山寰中傳

釋寰中。姓盧氏。河東蒲坂人也。稟靈特異。挺質殊倫。身支牖亭。頂骨圓峻。其聲若鐘響。其色猶脂凝。學通終古。辭實豐贍。年二十五。隨計中甲科。然未塞其懷。復思再捷。無何遭母之憂。遂廬於墓所。及服闋。徑往北京童子寺出家。二稔未周。諸經皆覽。明年往嵩嶽。

登戒肄習律部。於茲博通。忽慕上乘。決往百丈山。深得玄旨。後隱南嶽常樂寺。結茅於山椒。諫議大夫崔公深重其操。因別立方丈。虞淵景晞。一飯永日。然其乏水。羸瓶遠求。俄爾深宵。有虎嗥嘯廬側。詰旦視之。果濫泉坼地而湧。足其汲用。後之杭。浙江之北。有山號大慈。居未久。檀信爰臻。旋成巨院。四方僧侶。參禮如雲。屬武宗廢教。中衣短褐。或請居戴氏別墅焉。大中壬申歲。太守劉公首命髻染。重盛禪林。壬午歲二月十五日。囑累聲畢而終。時漸溽暑。驗其身一無變異。而頂門煥潤。冬窆於塔所。享年八十三。法臘五十。

四。有說常樂寺山虎跑泉。當中公滅日。忽焉乾涸。異哉。止資中之受用耳。至乾符丁酉歲。敕諡大師號性空。塔名定慧也。縉雲太守段成式爲真讚焉。

唐洛陽韶山寰普傳

釋寰普者。不知何許人也。稟形淳粹。克性謙沖。居於醜夷下風。請業汪汪。然其識度。輒難擬議。具戒之後。經論溫尋。然後杖錫南遊。澧陽遇夾山。而得心契。有參學舉問。垂手攜歸。不使一機失其開誘。其所不薦。勸令披覽經法。亦近秀寂之遺風耳。

唐衡山昂頭峯日照傳

釋日照。姓劉氏。岐下人也。家世豪盛。幼承庭訓。博覽經籍。復於莊老而宿慧發揮。思從釋子。卽往長安大興善寺。曇光法師下稟學納戒。傳受經法。靡所不精。因遊嵩嶽。問圓通之訣。欣然趨入。後遊南嶽。登昂頭峯。直拔蒼翠。便有終焉之志。庵居二十載。屬會昌武宗毀教。照深入巖窟。飯栗飲流。而延喘息。大中宣宗重興佛法。率徒六十許人。還就昂頭山舊基。結苫蓋。構舍宇。復居一十五年。學人波委。咸通中示滅。春秋一百八歲。至三年二月三日入塔。立碑存焉。天下謂其禪學爲昂頭照是歟。

唐朗州德山院宣鑒傳

釋宣鑒。姓周氏。劔南人也。生惡葷羶。少多英敏。宿賁異操。懇願出塵。大龍不屈於小庭。俊鶚必騰其層漢。旣除美飾。當預僧流。從受近圓。卽窮律藏。其諸性相。貫習偕通。聞重湖閑禪道大興。乃抗志雲遊。造龍潭信禪師。則石頭宗師之二葉也。始唯獨居一室。鑒強供侍之。一夕龍潭持一枝火授鑒。鑒接而行數步。且曰。久聞龍潭到來。龍之與潭俱不見歟。信曰。子親到矣。機與教符。日親丈室。三十餘年。後止澧陽。居無何。屬武宗搜揚。泊大中還。復法儀。咸通初。武陵太守薛

延望堅請。始居德山。其道芬馨。四海禪徒輻湊。伏臘堂中。常有半千人矣。其於訓授。天險海深。難窺邊際。雪峯參見。鑒深肯重。以咸通六年乙酉歲十二月三日。忽告諸徒曰。捫空追響。勞汝神邪。夢覺覺非。復有何事。言訖安坐而化。春秋八十四。僧臘六十五。身據牀坐。卓然七日如生在焉。天下言激箭之禪道者。有德山門風焉。今襄鄧漢東。法孫極盛者是。

唐明州棲心寺藏奘傳

釋藏奘。俗姓朱氏。蘇州華亭人也。母方娠。及誕。常聞異香。爲兒時嘗墮井。有神人接持而出。卅歲出家。禮

道曠禪師。及弱冠詣嵩嶽受具。母每思念涕泣。因
目不視。迨其歸省。卽日而明。母喪哀毀廬墓閒。頗有
徵祥。孝感如是。由此顯名。尋遊方訪道。復詣五洩山
遇靈默大師。一言辨析旨趣。符合顯晦之道。日月之
所然也。會昌大中衰而復盛。唯奘居之。熒不能惑。焚
不能熱。溺不能濡者也。洎周洛再構長壽寺。敕度居
焉。時內典焚毀。梵夾煨燼。手緝散落。實爲大藏。尋南
海楊公收典。姑蘇請奘歸於故林。以建精舍。大中十
二年。鄞水檀越任景求捨宅爲院。迎奘居之。剡寇求
甫率徒二千執兵晝入。奘瞑目宴坐。色且無撓。盜眾

皆悸懾叩頭謝過。寇平州奏請改額爲棲心寺。以旌
與之德焉。凡一動止禪者必集。環堂擁榻。堵立雲會。
與學識泉涌指鑒岐分。詰難排縱之眾。攻堅索隱之
士。皆立褰苦霧。坐泮堅冰。一言入神。永破沈惑。以咸
通七年秋八月三日。現疾告終。享年七十七。僧臘五
十七。預命香水鬚髮。謂弟子曰。吾七日在矣。及期而
滅。門人號慕。乃權窆天童巖。已周三載。一日異香凝
空。遠近郁烈。弟子相謂曰。昔師囑累。令三載後當焚
我身。今異香若此。乃發塔視之。儼若平生。以其年八
月三日。依西域法焚之。獲舍利數千粒。其色紅翠。十

三年弟子戒休賈舍利述行狀詣闕請諡奉敕哀誄。
易名曰心鑑。塔曰壽相。與在洛下長壽寺。謂眾曰。昔
四明天童山僧曇粹是吾前生也。有墳塔存焉。相去
遼遠。人有疑者。及追驗事實。皆如其言。初任生將迎
與。人或難之。對曰。治宅之始。有異僧令大其門。二十
年之後。當有聖者居之。比與至止。果二十年矣。又與
將離姑蘇。爲徒眾畱擁。乃以櫻拂與之曰。吾在此矣。
汝何疑焉。暨乎潛行。眾方諭其深旨。又令寺之西北
隅。可爲五百墩以鎮之。或曰。力何可致。與曰。不然。作
一墩植五株栢可也。凡微言奧旨。皆此類也。刺史崔

琪撰塔碑。金華縣尉邵朗題額焉。

唐真定府臨濟院義玄傳

釋義玄。俗姓邢。曹州南華人也。參學諸方。不憚艱苦。因見黃檗山運禪師。鳴啄同時。了然通徹。乃北歸鄉土。俯徇趙人之請。住子城南臨濟焉。罷唱經論之徒。皆親堂室。示人心要。頗與德山相類。以咸通七年丙戌歲四月十日示滅。敕諡慧照大師。塔號澄虛。言教頗行於世。今恆陽號臨濟禪宗焉。

唐洛京廣愛寺從諫傳

鑒宗

釋從諫。姓張氏。本南陽人也。徙居廣陵。生於淮甸焉。

爲性倜儻器宇崇峙。於閭里閒爲時畏服。遇相工曰。子身長八尺。眉目秀朗。他日必荷榮寄。諫曰。心不願仕。於榮寄何有。相工曰。所寄荷不可測也。越壯室之年。忽深信佛理。遂捨妻孥。求僧披鬚焉。甫登戒地。頗護心珠。因悟禪。邠頓了玄理。方數十載。同好之者自遠而來。請問諫。一一指訂。俾其開覺。尋遊洛下。廣愛寺挂錫。時禪客鱗集。如孝子之事父母焉。洛中有請諫設食。必排位對賓。頭盧尊者。其爲人之欽奉。皆此類矣。屬會昌四年。詔廢佛塔廟。令沙門復桑梓。亦例澄汰。乃烏帽麻衣。潛於皇甫氏之溫泉別業。後岡上。

喬木駢鬱。巨石砥平。諫於夏中。常就此入定。或補毳事。忽遇頽雲駛。雨霆電擊石。烈風兼至。凡在此者。驚奔恐懼。諫唯欣然加趺而坐。若無所聞者。或問諫曰。惡畜生何爾。大中初。宣皇詔興釋氏。諫還歸洛邑舊居。其子一日自廣陵來覲。適與諫遇於院門。威貌嚴莊。不復可識。乃問曰。從諫大德所居。諫指之東南可尋。其子旣去。遂闔門不出。其割裂愛網。又若此也。咸通七年丙戌歲夏五月。忽出詣檀越家辭別曰。善建福業。貧道秋初當遠行。故相聞耳。至秋七月朔旦。旦盥手焚香。念慈氏如來已。右脇而臥。呼門人玄章。誡

之曰。人身難得而易失。急急於物。無心無爲。流轉無
生滅法。一切現存。今乃生也。有涯。暫與爾別。是日無
疾而化。行年八十餘矣。玄章等奉遺旨。送屍於建春
門外尸陀林中。施諸鳥獸。三日復視之。肌貌如生。一
無近者。遂以餅餌覆之。經宿有狐狼迹。唯啖所覆身
且儼如。乃議用外國法焚之。收合餘燼。起白塔於道
傍。人尤歸信香火不絕焉。次有杭州徑山院釋鑒宗。
湖州長城人也。姓錢氏。卽禮部侍郎徽之孫。父晟有
疾。宗割股肉饋啖之。給云。他畜之肉。未幾病閒。孝譽
聞於親里。乃求出家。時州開元寺有上都臨壇十望。

大德。內供奉高閑。閑善草隸。嘗對懿宗御前書。甚高華望。宗誓禮爲師。後出學涉通淨名思益經。遂常講習。閑公亦示其筆法。漸得鳳毛焉。倏往謁鹽官悟空大師。隨眾參請。頓徹心源。卻復故鄉。勸人營福。咸通三年辛巳。巡歷名山。遂止天目東峰徑山焉。道俗歸心。恢揚法教。出弟子尤者天童山咸啓。敕賜紫衣。背山行滿。皆分枝化物。至七年丙戌閏三月五日示滅。遷塔於大寂巖下。梁乾化五年。吳越國王尙父錢氏表請追諡大師。曰無上祖門。傳號爲徑山第二祖。時吳興沈修者。自號白牙先生。述德爲讚記焉。

唐洪州洞山良价傳

釋良价。俗姓俞氏。會稽諸暨人也。少孺從師於五洩山寺。年至二十一。方往嵩山具戒焉。登卽遊方。見南泉禪師。深領玄契。續造雲巖。疑滯頓寢。大中末。於新豐山大行禪法。後盛化豫章高安洞山。今筠州也。价以咸通十年己丑三月朔旦。命髻髮披衣。令鳴鐘奄然而往。時弟子輩悲號。价忽開目而起曰。夫出家之人。心不依物。是真修行。勞生息死。於悲何有。淪喪於情太麤著乎。召主事僧令營齋。齋畢。吾其逝矣。然羅心戀慕。從延其日。至於七辰。食具方備。价亦隨齋。謂

高僧傳三集卷十二
眾曰。此齋名愚癡也。蓋責其無般若歟。及僧唱隨意
曰。僧家勿事太率。臨行之際。喧動如斯。至八日浴訖。
端坐而絕。春秋六十三。法臘四十二。敕諡禪師。曰悟
本。塔號慧覺矣。

系曰。其卻畱累日。古亦有之。如价之來去自由者。近
世一人而已。

唐蘇州藏廩傳

釋藏廩。俗姓程。衢州信安人也。幼歲神氣朗暢。貌質
魁然。元和中。告親求出家。志不可卻。直造長沙嶽麓。
投靈智律師。請事鬚染。智師察其強願不羣。乃攝度。

之。旣披法服。尋於武陵開元寺智總律師受具足尸
羅。當長慶三年也。因聽律範。旋窮篇聚。語同業曰。教
門繁廣。然有總門。總門之急。勿過捨筏。遂徧參禪宗。
遇馬素門下高足住龍牙山。知廩法器。異日告之曰。
蘊界不真。佛生非我。子之正本。當何所名。復從誰得。
廩一言領會。干轍同歸。龍牙曰。我法眼不蒙掩矣。旣
遂所求。大得安靜。卻迴柯山。蓋避會昌之搜揚也。至
大中六年。郡牧崔公壽重之。於州龍興寺別構禪室。
延居之。數年。北至嘉禾。信士歸依。請畱住。至德伽藍。
又往姑蘇。時崔公鈞作守此郡。聞廩名久。請居南禪。

院。咸通八年。浙西廉使周公寶命住招隱寺。其年秋。卻返嘉禾。信士呂京捨別墅造今永安院。時乾符中。羣寇紛紜。禪侶分散。廩曰。盜終不至此。及期寇從別道行。果無所損。其先見如此。五年十月十二日。滿院陰雲雉鳴。鳥噪安坐而化。弟子號哭。卻穌。至六年三月中辰前。別眾後終。享年八十二。僧臘五十六。時澹交爲廩作真讚。至乾寧中。僧神贊進狀乞追諡號塔名。名士吳重裕書碑。

唐福州怡山院大安傳

釋大安。姓陳氏。閩城人也。幼年入道。頓拂塵蒙。元和

十二年敕建州浦城縣乾元寺置兜率壇。始全戒足。時天雨桂子及地生朱草。刺史元錫手疏其瑞。上達冕旒。遂迴御禮詔改鳳棲寺。號靈感壇焉。安因往洪井。路出上元。忽逢一老父曰。子往南昌必有所得。及咨參律學。夜聞二僧談論。遽了三乘之旨。乃以所習付之。同人之臨川。見石鞏山慧藏禪師。藏之提唱。必持弓弩以擬學人。安服拜未興。唱曰。看箭。安神色不撓。荅對不差。石鞏乃投弩曰。幾年射。始中半人也矣。安遊五臺。入龍池沐浴。雖久寢漣漪。殊無奮暴雨雹之怪。觀者驚悚。後止瀉山禮大圓禪師。復證前聞。而

爲量果也。時豫章廉使贈太尉崔貞孝公。則魏公之季父。深契玄機。敦安之道。飛疏召之。厥譽愈昌。咸通十四年。詔宜號延聖大師。賜紫袈裟一副。中和二年。示疾。所止法堂。巨梁中折。三年癸卯十月二十二日。坐化於怡山丈室。春秋九十一。臘六十七。續詔贈圓智大師。塔號證真。安不嘗唾地。不處溫房。隨化而衣。天雨而浴。諮法弟子慧長。入關揚安之德。故有追諡也。博陵司空相國仰慕前列。遂著文頌德。詩人周朴。篤重安。時入山致禮焉。

唐長沙石霜山慶諸傳

洪謹
令達

釋慶諸。俗姓陳。廬陵新淦玉笥鄉人也。乃祖厥考。咸不爲吏。清言放蕩焉。諸始十三。禮紹鑾禪翁爲師。於洪井西山鬚髮。二十三往嵩山受具戒。便就東洛學毗柰耶。旣知聽制。終謂漸宗。迴抵南嶽。入大瀉山。次屈雲巖。遇道吾。垂問知意。方爲二夏之僧。得石霜山。便議終焉之志。道吾躬至石霜山。日勤執侍。往還問荅。語在別錄。諸貌古氣真。世無能識。時洞山新滅。俄爲遠方禪侶圍遶。因入深山無人之境。結茅宴坐。時眾追尋。倏有見者。皆號哭交請。出爲吾曹。諸將安往。由是辰夕被遊學者扣擊。可無希聲以應之乎。如是

二十年閒。堂中老宿。長坐不臥。屹若樛杌。天下謂之石霜枯木眾是也。南方謂之叢林者。翻禪那爲功德叢林也。爲四方清則者。無出其右。以光啓四年戊申歲二月己亥。示疾終於山院。高齡八十二。僧臘五十九。越三月十五日葬於寺西北隅二百許步。門弟子等。結墳塔。作螺髻形。夏四月一日。廣化寺釋子處訥追慕往德。恐遺美聲。命南嶽玄泰纂錄言行。諸方弟子分行其道焉。敕謚普會大師。塔曰法相。次餘杭徑山院釋洪諲。俗姓吳。吳興人也。年纔十九。於開元寺禮無上大師出家落飾。精加佛事。罔怠巾緋。二十二

遣往嵩嶽會善寺受滿足律儀。俾誦大比丘戒。而七日念終。遂習毗尼。尋傳經講。自謂爲僧有逸羣事業。而歸禮本師。曰。汝於十二時中。將何報荅四恩三有。譚聞斯詰。慙然失措。三日忘食。本師卻招誘提耳。方明本事。如是往還雲巖。次瀉山。各爲切磋。蔚成匠手。俄而會昌中。例遭黜退。眾人悲泣者。惋歎者。譚晏如也。曰。大丈夫鍾此厄會。豈非命也。夫何作兒女之情乎。時於長沙遇信士羅旻。召居家供施。蓋譚執白衣比丘法。初無差失。涉於二載。若門賓焉。大中初。除滅法之律。乃復厥議。還故鄉西峰院。至咸通六年。上徑

盛稱洞上禪師言要。膺感動神機。遂專造焉。如是洞上垂接。復能領會。曾問曰。我聞思大禪師向倭國爲王。虛耶實耶。對曰。若是思師。佛亦不作。況國王乎。自爾洞上印許。初住三峯。後就雲居提唱。時唐之季。鍾氏據有洪井。傾委信誠。每一延請入州。則預潔甘子。堂以禮之。乃表於昭宗。賜紫袈裟一副。并師號焉。都不畱意。所化之徒。寒暑相交。不下一千餘眾。牛頭香樹圍遶者。皆是梅檀。金翅鳥王。軒翔者。不齊尺鷃。四方饋供。千里風從。如荆南帥成汭。遣賁檀施。動盈鉅萬。以天復元年辛酉秋。示疾。至明年正月三日而化。

焉。豫章南平王鍾氏供其喪葬。時諸道禪子各依鄉土所尙者。隨靈龕到處。列花樹帳幔粉麪之饌。謂之卓祭。一期凶禮之盛。勿過於時也。猗歟。膺出世度人。滿足三十年。遺愛可知也。

唐縉雲連雲院有緣傳

釋有緣。俗姓馮。東川梓潼人也。小學之年。往成都福感寺事定蘭開士。卽宣宗師矣。隨侍出入多在內中。一旦宣召。帝以筆書其衫背云。此童子與朕有緣。由茲召體矣。大中九年。遇白公敏中。出鎮益部。開戒壇。卽於淨眾寺具尸羅也。續於京輦聽習經律。五臘後。

身披布褐。手執墨敕。海內遊行。參見小馬神照。凡同時叢林禪祖。無不禮謁者。乃居除州華山。及南遊至武夷山。時廉使李誨爲築禪室。乾符三年。至縉雲龍泉大賽山立院。因奏祠部。給額號龍安。敕度七僧。住十八載。安而能遷止。連雲院焉。太守盧約者。以謔諒之誠。請入州開元寺別院。四事供施焉。天祐丁卯歲。四月八日。示疾。至六月朔日。終於廨署。報齡七十三。臘五十二。遺旨。囑制置揚習司空主喪務。於寺南園茶毗。火滅。散分舍利數百粒。後收四十九粒。并遺骨一餅。瘞於石塔。晉開運三年乙巳歲。文泰律師撰塔

碑焉。

唐福州雪峰廣福院義存傳

釋義存。長慶二年壬寅。生於泉州南安縣曾氏。自王父而下。皆友僧親佛。清淨謹愿。存生而鼻逆葷血。乳抱中。或聞鐘磬。或見僧像。其容必動。以是別垂愛於膝下。九歲請出家。怒而未允。十二從家君遊蒲田玉潤寺。有律師慶玄持行高潔。遽拜之曰。我師也。遂畱爲童侍焉。十七落髮。來謁芙蓉山。恆照大師見而奇之。故止其所至。宣宗中興釋氏。其道也。淫而不緇。其身也。衰然而出。北遊吳楚。梁宋燕秦。受具足戒於幽

州寶刹寺。訖巡名山。扣諸禪宗。突兀飄颻。雲翔鳥逝。爰及武陵。一面德山。止於珍重。而出其徒數百。咸莫測之。德山曰。斯無階也。吾得之矣。咸通六年。歸於芙蓉之故山。其年圓寂。大師亦自瀉山擁徒。至於怡山。王真君上昇之地。其徒孰孰師已累嗣德山而疑關。存拒而久之。則有行實者。始以存同而議曰。我之道巍巍乎。法門圍遶之所。不可造次。其地宜若布金之形。勝可矣。府之西二百里。有山焉。環控四邑。峭拔萬仞。崿崿以支。圓碧培塿。以覲羣青。怪石古松。棲蟄龜鶴。靈湫邃壑。隱見龍雷。山之巔。先冬而雪。盛夏而寒。其樹

皆別垂藤蘿。芊茸而以爲之衣。交錯而不呈其形。奇姿異景。不可殫狀。雖霍童武夷無以加之。實閩越之神秀。而古仙之未攸居。誠有待於我也。祈以偕行去。秋七月。穿雲躡蘚。陟險昇幽。將及之。存曰。眞吾居也。其夕。山之神果效靈。翌日。巖谷爽朗。煙霞飛動。雲庵旣立。月構旋隆。繇是。柅法輪於無爲。樹空門於有地。行實乃請名其山曰雪峰。以其冬雪夏寒。取鷺嶺。猴江之義。斯則庚寅逮於乙未。存以山而道任。山以存而名出。天下之釋子。不計華夏。趨之若召。乾符中。觀察使京兆韋公中和。中司空潁川陳公。每渴醍醐而

不克就飲。交使馳懇。存爲之入府從人願也。其時內官有復命於京。語其道。其儕之拔俗悟空者。請蛻浮華而來脫屣。僖宗皇帝聞之。翰林學士訪於閩人陳延效。得其實奏。於是乃錫眞覺大師之號。仍以紫袈裟俾延效授焉。存受之如不受。衣之如不衣。居累夏。辛亥歲朔。遽然杖屨。其徒啓而不荅。雲以隨之。東浮於丹。止四明。明年屬王侍中之始據閩越。乃洗兵於法雨。致禮於禪林。馥存之道。常東望頂手。後二年。自吳還閩。大加禮異。及閩王王氏誓眾養民之外。雅隆其道。凡齋僧構刹。必請問焉。爲之增宇設像。鑄鐘以

嚴其山。優施以充其眾。時則迎而館之於府之東西
甲第。每將儼油幢。聆法論。未嘗不移時。僅乎一紀。勤
勤懇懇。熊羆之士。因之投跡檀那。漁獵之逸。其或弭
心鱗羽。戊辰年春三月。示疾。閩王走醫。醫至粒藥以
授。存曰。吾非疾也。不可罔子之工。卒不餌之。其後札
偈以遺法子。函翰以別王庭。夏五月二日。鳥獸悲鳴。
雲木慘悴。其夜十有八刻。時滅度。俗壽八十有七。僧
臘五十有九。以其月十五日。塔而藏之。爾日奔走閩
之僧尼士庶巷無居人。閩王漣如出涕。且曰。師其捨
予一何遽乎。遣子延稟躬祭奠之。復齋僧焉。存之行

化四十餘年。四方之僧爭趨法席者。不可勝算矣。冬夏不減一千五百。徒之環足其趨也。馳而愈離。辯而愈惑。其庶幾者。一曰師備。擁徒於玄沙。今安國也次曰可休。擁徒於越州洞巖。次曰智孚。擁徒於信州鵝湖。其四曰惠稜。擁徒於泉州招慶。其五曰神晏。住福州之鼓山。分燈化物。皆膺聖獎。賜紫袈裟。而玄沙級宗一大師焉。

系曰。雪峰道也。恢廓乎。駿奔四海。學人所出門生形色不類。何邪。玄沙乘稜巖而入道。識見天殊。其猶諺曰。青成藍。藍謝青。師何嘗在明經。故有過師之說。一

則雪峯自述塔銘已盡其致也。一則玄沙安立三句。決擇羣見。極成洞過歟。今江表多尙斯學。此學虛通。無繫了達。逍遙勿拘。知乘急也。雪峯化眾切乎杜嘿。禪坐。知戒急也。其能各捨一緩。以成一全。則可乎。

唐澧州蘇溪元安傳

釋元安。俗姓淡。鳳翔遊鱗人也。卯年於岐陽懷恩寺。從兄祐律師出家。唯經與論。無不窮核。乃問道翠微。次臨濟。各餐法味。若飫香積之孟也。斲彫復朴。逍遙自如。聞夾山道盛德至。造澧陽。當稽問轆轤。又增明淨。後開樂普山。尋居蘇溪。荅訓請益。多偶句。華美爲

四海傳焉。以昭宗光化元年戊午十二月遷滅。高壽六十五。法臘四十六矣。臨終告眾頗多警策辭句云。

唐明州雪竇院恆通傳

招賢岑師

釋恆通。俗姓李。邢州平恩人也。家傳士族。幼而知學。蘇秦顯達。猶懷二頃之田。元亮孤高。不羨五斗之祿。縱越挾天。擲地拖紫腰金。瞬息浮華。豈裨來業。父母終禮。年甫十三。潛入鵲山。訪道依師。既罷。止墳唯披釋典。精虔懺誦。懇侍巾瓶。不弭。初終蒙恩。鬚度。年二十。於本州開元寺具戒。後往京兆薦福寺。聽習經律。七八年間。尋窮藏教。乃曰。摩騰入漢。譯著斯文。聖胄

來梁復明何事。因辭北闕逕詣南方。遇招賢岑大師。大師問曰。何處人也。曰。邗州人也。招賢曰。我道不從彼來。通曰。和尚還住此無。於是有滯。皆伸無疑不決。後指洞山石霜皆往參焉。招賢示滅。通以弟子禮事之。咸通末。遊宣城。尚書崔寓。素奉禪門。攀迎莊肅。覩通儀表拔俗。問荅往還。崔甚悅服。於謝仙山奏置禪院。號瑞聖。請以居之。四方毳衲之徒。不邀自聚。博陵方議奏薦師號。堅讓遂寢。中和末。文德初。羣寇競起。通領徒至四明。大順二年。郡牧黃君晟。請畱居雪竇焉。蔚然盛化。天祐二年七月。示疾。越九日。躬入浴室。

卻坐繩牀。集眾焚香。勤勤付囑。合掌而逝。春秋七十二。夏臘五十二。以其年八月七日。遷石塔於院之西南。二百餘步。或曰。通臨終言。我龐勛也。此非也。高僧無作爲行錄。而無此說。若觀年臘。龐勛豈正弱冠來逃難邪。

唐袁州仰山慧寂傳

釋慧寂。俗姓葉。韶州須昌人也。登年十五。懇請出家。父母都不聽允。止十七再求。堂親猶豫未決。其夜有白光二道。從曹溪發來。直貫其舍。時父母乃悟。是子至誠之所感也。寂乃斷左無名指及小指。器藉跪致。

堂階曰。荅謝劬勞如此。父母其不可畱。捨之。依南華寺通禪師下削染。年及十八。尙爲息慈。營持道具。行尋知識。先見耽源。數年良有所得。後參大滄山禪師。提誘哀之。棲泊十四五載而足跋。時號跛腳驅烏。凡於商擢多示其相。時韋胄就寂。請伽陀。乃將紙畫規圓相。圓圍下注云。思而知之。落第二頭。云不思而知。落第三首。乃封呈達。自爾有若干勢。以示學人。謂之仰山門風也。海眾摳衣得道者。不可勝計。往往有神異之者。倏來忽去。人皆不測。後敕追諡大師曰智通。塔號妙光矣。今傳仰山法。示成圖相。行於代也。

唐天台紫凝山慧恭傳

釋慧恭。俗姓羅氏。福州閩人也。家傳儒素。不交非類。母妊之初。夢所居湧出浮圖。上參於天。迨恭誕生。嶷然聰悟。年十七。舉進士。名隨計車。將到京闕。因遊終南山奉日寺。目祖師遺像。釋然世網。遂求出家。操執僧事。備歷艱辛。二十有二。適值新創安國寺。受具足戒。尋乃遊方。緣嶮涉荒。而無難色。嘗遇黑蛇傷指。不求醫而毒螫自銷。見魑魅占山。諭罪福而妖物遄息。至武陵德山。詣宣鑒禪師。領會風飛。由茲道合。因挂錫施門人禮。鑒公順世後。遊玉山。至信州。刺史營西。

禪院而禮之。其徒數百人。居歲餘。以郭郭喧繁。復入福州長溪馬冠山。自馬冠抵泉州富陽山。所至之所檀施臻集。徒侶解鉢禪坊立就。其爲士庶嚮奉如此。景福三年。與門人遊天台。州牧京兆杜雄畱之而止。杜因創瑞龍院於紫凝山。祈恭興揚法席。以悟淪迷。緇俗雲馳。香花山積。天復三年癸亥十二月午時。命衆聲鐘。顧瞻左右。促言云去。加趺瞑目。儼然而化。春秋八十四。僧夏六十二。闡圓頓之宗。居道德之最。歿無易名塔。無題榜。足見浮名爲桎梏耳。門人上足師遂植松。負土力崇塔廟。所謂法空不壞因緣矣。因緣

高僧傳三集卷十二
三
有之。孝行曷傷於道云。

唐杭州龍泉院文喜傳

釋文喜。姓朱氏。嘉禾禦兒人也。母氏方娠。夢吞桃三蒂。至誕。彌不味葷羶。七歲詣本邑常樂寺僧清國下出家。國卽喜之渭陽也。勒誦經并懺文十卷。方遂削染。往越州開元寺學法華經。集天台文句。卽時敷演。則救螳分中。便能講訓也。開成二年。屆趙郡。受近圓。登習四分律。屬會昌澄汰。變素服。內祕之心。無改。遇大中初年例。重懺度於鹽官齊豐寺。講說。後往禮大慈山性空禪師。誨之曰。子何不學善財徧參乎。咸通

壬午歲至豫章觀音院。見仰山。喜於言下了其心契。仰山令典常住。一日有異貌僧就求齋食。喜減已食饋之。仰山預知。故問曰。此果位僧求食。汝供給周旋否。荅曰。輟已分回施。曰。汝大得利益。七年旋浙右止千頃山。築室居之。十年餘。杭劉嚴合馬徵請居龍泉古城院。凡十一年。乾符己亥歲。巢寇掠地至餘杭。喜避地湖州。餘不亭。刺史杜孺休請住仁王院。光啓三年。武肅王錢氏始牧杭郡。降疏請住龍泉。解署。今慈光院是也。大順元年。威勝軍節使董昌。武肅王同年發表薦論。兩賜紫衣。乾寧四年。奏師號曰無著。光化

三年示疾十月二十七日加趺坐而終於州郭廨署。春秋八十僧夏六十。終時方丈上發白色光。竹樹變白。十一月二十二日遷塔於靈隱山西塢。喜形貌古朴。骨強而瘦。戒德禪門真知識也。初喜寓居雪川。廣明元年夏有蝗飛翳天下食田苗。喜自將拄杖懸挂袈裟標於畎澮中。其蟲將下。遂厲聲叱之。悉翻飛而去。十頃之苗斯年獨稔。其感通如此。或云所傳得馬祖細衲袈裟以爲信寶矣。遷葬之後。天復二年壬戌八月中宣城帥田頔。應杭將計思叛。渙縱兵大掠。發喜塔見肉身不壞。如入禪定。髮爪俱長。武肅王奇之。

遣裨將邵志。祭後重封瘞焉。

唐明州伏龍山惟靖傳

釋惟靖。吳門人也。年三十許。形奇貌古。且類憨癡。入國寧寺。巡僧房。唱曰。要人出家。請畱。下至經藏院。見二眾闍黎。大德慧政。便跪拜。伸誠願。容執侍。政公允納。與翦飾。於天台受具。暫歸謝政。便尋訪名山。有知識處。必經寒燠。自爾勤於禪法。未嘗發言。卽居定光禪師廢金地道場。侵星赴禪林寺晨粥。而多虎豹隨到寺門。虎踞地若伺候。靖出復隨至金地。遲明巨迹極多。靖恐人知。以鋤滅虎跡。俄患背疽困睡。有鳩鳥

糞於瘡所。非久全愈。又虞冰雪備粳粒半斗。每日以
銚合菜煮食。寘粳於地窖中。過期用米常滿不耗。靖
乃築之。而云吾被此物。知非理也。尋居伏龍山。山可
瞰海。峯勢崿嶢。昔僧鑒諸曾隱於是。諸卽唐王相國
之母弟也。能文習道。刺史多往謁之。靖續遁此山。刺
史黃晟常請出州。供施繁委。末於奉川北山置院。示
疾坐終。高齡七十餘。窆於山下瑩塔存焉。

高僧傳三集卷第十二

終

音釋

廩

夷益切

闕

苦穴切

坼

恥格切

墅

上與切

燠

乙六切

窆

陂驗切
葬也

悸

悸懾
懾其季切
心動也

榎

榎子紅切
櫚也
墩都

切

平地

砥

諸市切

紿

欺也

淦

水名

榴

持切

木

立死也

机

五

諶

於真

惋

驚歎也

倭

鳥禾切

忽

切木

無枝也

嶮

嶮疾

由切

倭

國名

覲

莫白

鳥

名

訥

而稅

嶮

嶮疾

由切

倭

鳥禾切

覲

茸

茸數容切

茸

而容

翌

逸織切

梔

女履

鞞

鞞

肴

切鞞

古曷切

揆

以冉切

摧

訖岳切

郭

郭芳無切

澮

古外切

稔

穀熟也

頽

俱倫

慙

愚呼甘切

鉹

燒器也

窖

居效切

瞰

苦紺切

高僧傳三集卷第十三

宋左街天壽寺通慧大師賜紫沙門贊寧等

奉敕撰

習禪篇第三之六

正傳十七人
附見六人

唐東京封禪寺圓紹傳

釋圓紹。姓孫氏。其先富陽人也。祖官於南燕。因爲滑臺白馬人焉。年及識環。天然俊邁。鄰兒戲玩我且恬然。羣從追隨我惟閑靜。年當十八。方遂志出家。師事明福寺正覺禪師。覺見而異之。訓諸徒弟。獨許紹耳。曰。真空門之偉器也。至年二十二。於相州義檀香燈

律師邊受具。登卽尋師訪道。效祖參玄。二翼之餘。一孟之外。必無他物。唯誓禪宗立雪傳衣。是其素望也。至於三湘五嶺。二蜀兩京。凡曰叢林。一皆參禮。旣探至蹟。頓了心機。乃挂錫於夷門。卽倉垣水南寺。今爲開寶也。大中十年。適遇唐相國裴公休罷調商鼎來鎮魏郊。同氣相求。一言道合。卽命居今東上方院也。紹將聚禪徒。患其迫窄。遂開上院之西。損上益下。時檀施臻萃。倏成巨院。擁納之流。數盈二百。橫跨夷門山之峻嶺焉。紹卽七祖荷澤神會禪師五葉法孫也。演其無念。示以真心。了達磨之密傳。極南能之深趣。

時參學之眾擁從且繁。遇元帥相國王晉公鐸。以紹道行通感神祇效靈。降甘露於玄穹。洎嘉瑞於青檜。奏僖宗。賜院額曰雙林。師號曰法濟。別敕令度侍者七人。其開法會興盛。士庶歸心。僅四十載。所化人可萬計。僧尼弟子五百餘人。以乾寧二年乙卯七月四日。謂眾曰。急急自了去。本爲逃生死。若不解玄旨。何時得脫。吾景逼崦嵫。此爲最後之言也。於方丈中寂然而化。俗壽八十五。法臘六十三。敕許於本院西南隅建塔焉。越五年二月二日。重開塔。髮長半寸。儀貌如生。乃以香華供養七日。遠近瞻禮。稱歎希奇。已而

行茶毗。火中迥出五色神光。收舍利百餘粒。四散隨心。淘選近一千粒。溫潤玉潔。璨爛珠圓。驗五分之熏成。匪一生之構集。四眾虔仰。復迎入塔。卽昭宗皇帝戊午歲也。睢陽相國袁象先理於浚郊。弟子惠靄等冀終法乳。列狀乞舉行諡禮。梁乾化三年癸酉。太祖敕易名曰定覺。塔曰靈化。至貞明四年九月。惠靄等欲旌表師德。立碑。敕允。開封尹王公瓚之文也。

唐蘄州黃岡山法普傳

休靜

釋法普。姓潘氏。廬江人也。貌古情寬。擁敗納觀。方元和中。因見黃岡山色奇秀。其峰巉崿。其林鬱密。中有

石壇平坦而高峙。乃放囊挂錫於中。班荆久之。尋附樹架蓬茨。僅容身而已。未幾有人自小徑而至。見普驚怪。問云。何緣至此。曰。某本行山麓。見巔頂騰漲紫氣。盤紆可愛。意此山有尤物故來耳。諦視普遲迴而去。山下行者聞而尋焉。禪學之徒。不數年遽盈百數。普卻之曰。老僧獨居無物利人。君等亦無所乏。由是星居之庵多矣。弟子廣嚴等構成大院。禪客翕如。傳其法者無算。一日集眾。辭云。吾其終矣。汝曹善住。珍惜。加趺坐胡牀而卒。其身不壞散。後以香泥塗續之。至乾符中。重立碑頌云。次洛京華嚴寺釋休靜。不知

高僧傳三集卷二十三
何許人也。屬洞山禪道風行。靜往造之。抉擿所疑。若雷復於本位焉。北返於洛邑開演。因赴內齋。諸名公皆執經諷讀。唯靜并其徒俱默坐。帝宣問胡不轉經。酬荅響應。仍皆屬對。悅可帝情。尋迴平陽示滅。收舍利四處樹浮圖。敕謚寶智大師。塔號無爲也。

梁鄧州香嚴山智閑傳

大同

釋智閑。青州人也。身裁七尺。博聞強記。有幹略。親黨觀其所以。謂之曰。汝加力學。則他後成佐時之良器也。俄爾辭親出俗。旣而慕法心堅。至南方禮瀉山大圓禪師盛會。咸推閑爲俊敏。瀉山一日召對。茫然將

諸方語要。一時煨燼曰。畫餅弗可克飢也。便望南陽
忠國師遺跡而居。偶芟除草木。擊瓦礫失笑。冥有所
證。抒頌唱之。由茲盛化。終後敕諡襲燈大師。塔號延
福焉。次舒州桐城投子山釋大同。姓劉氏。舒州懷寧
人也。幼性剛正。有老成氣度。因投洛下。保唐滿禪師
出俗。初習安般。觀業垂成。遂求華嚴性海。復負錫謁
翠微山法會。同伏牛元通。激發請益。大明祖意。由是
放蕩周遊。還歸故土。隱投子山。結茅茨棲泊。以求其
志。中和中。巢寇蕩履京畿。天下悖亂。有賊徒持刃問
同曰。住此何爲。對以佛法。魁渠聞而膜拜。脫身服裝。

而施之下山。以梁乾化四年甲戌四月六日加趺坐
亡。春秋九十六。法臘四十六。凡居化此山三十餘載
云。

梁撫州疎山光仁傳

本仁
居遁

釋光仁。不知何許人也。其形矬而么麼。幼則氣概凌
物。精爽殆與常不同。早參洞山。深入玄奧。其辯給又
多於人也。嘗問香巖禪師。荅微有偏負。曰某累繭重
胝而至。得無勞乎。唾地而去。後居臨川疎山。毳客趨
請。頗有言辭。著四大等頌。略華嚴長者論。行於世。終
入龕中。已有白鹿至靈前。屈膝而起。時眾謂爲作弔。

焉。次筠州白水院釋本仁。不知何許人也。得心於洞山法席。仁罕談道。而四方之人。若影之附形。卻之還至。乃徇丹陽人請。住無幾時。天復中。至洪井高安白水院聚徒。垂欲入滅。先觸處告違。乃集眾焚香曰。至香煙盡處。是某涅槃時。如其言端坐而化。次龍牙山釋居遁。姓郭氏。臨川南城人也。年殆十四。警世無常。而守恬淡。白親往求出家。於廬陵滿田寺。於嵩山受具。戒已。思其擇木。乃參翠微禪會。迷復未歸。莫知投詣。聞洞上言。玄格峻。而躬造之。遁少進。問曰。何謂祖意。荅曰。若洞水逆流。卽當爲說。而於言下體解。玄微。

隱眾栖息。七八年閒孜孜戢曜。時不我知。久則通矣。天策府楚王馬氏素藉芳音。奉之若孝悌之門。稟昆長矣。乃請居龍牙山妙濟禪院。僦僦徒侶。常聚半千。爰奏舉。詔賜紫袈裟。并師號證空焉。則梁貞明初也。方嶽之下。號爲禪窟。闕其室。得其門者。亦相繼矣。至龍德三年癸未歲八月。遘疾彌留。九月十三日歸寂。遁出世近四十餘齡。語詳別錄。

梁福州玄沙院師備傳

釋師備。俗姓謝。閩人也。少而憨黠。酷好垂釣。往往泛小艇南臺江白娛。其舟若虛。同類不我測也。一日忽

發出塵意。投釣棄舟。上芙蓉山出家。咸通初年也。後於豫章開元寺具戒。還歸故里。山門力役無不率先。布衲添麻。芒屨續草。減食而食。語默有常。人咸畏之。汪汪大度。雖研桑巧計。不能量也。備同學法兄。則雪峰存師也。一再相逢。存多許與。故目之爲備頭陀焉。有日謔之曰。頭陀何不徧參去。備對曰。達磨不來東土。二祖不往西天。存深器重之。先開荒雪峰。備多率力。王氏始有閩土。奏賜紫衣。號宗一大師。以開平二年。戊辰十一月二十七日示疾而終。春秋七十四。僧臘四十四。閩越忠懿王王氏樹塔。備三十年演化禪。

高僧傳三集卷十三
二
侶七百許人。得其法者。眾推桂琛爲神足矣。至今浙之左右山門。盛傳此宗。法嗣繁衍矣。其於建立。透過大乘初門。江表學人。無不乘風偃草歟。

梁河中府棲巖山存壽傳

釋存壽。不知何許人也。清標勝範。造次奚及。罷尋經論。勇冠輩流。往問津於石霜禪師。決了前疑。虛舟不繫。乃爲枯木眾之樞机矣。後還蒲坂。緇素歸心。時冀王友謙受封屏翰。好奇徇異。聞人一善。厚禮下之。王召入府齋。論道談玄。不覺膝之前席。頗增奉仰。續爲菩薩戒師。供施更蕃。度門人四百許員。尼眾百數。壽

平日罕言。言必利物。喜慍之色人未嘗見。望之若孤松淩雪焉。終時春秋九十三。加趺而坐。一月後髭髮再生。重髻入塔。塔之亭每有虎旋遶。瓜跡時繁。敕諡爲真寂大師焉。

梁台州瑞巖院師彥傳

釋師彥。姓許氏。閩越人也。早悟羈縻。忽求拔俗。循乎戒檢。俄欲觀方。見巖頭禪師。領會無疑。初樂杜默。似不能言者。後爲所知。敦喻允請。住台州瑞巖山院。時道忞往參問。荅對響捷。忞公神伏。後二眾同居。彥之威德凜若嚴霜。糾正僧尼。無容舛悟。故江表言御眾。

翦齊者。瑞巖爲最。嘗有三僧。胡形清峭。目睛轉若流電焉。差肩竝足致禮。彥問曰。子從何來。曰。天竺來。何時發。曰。朝行適至。彥曰。得無勞乎。曰。爲法忘勞。乃諦視之。足皆不蹈地。彥令入堂。上位安置。明旦忽焉不見。云是辟支迦果人。然莫知階級。時有不測人入法會。非止一過。彥參學時。號爲小彥。長老兩浙武肅王錢氏累召。方肯來儀。終苦辭去。寺倉常滿。嘗有村媪來參禮。彥曰。汝休拜跪。不如疾歸家。救取數十百物。命大。有利益。媪念忙到舍。兒婦提竹器拾田螺正歸。媪接取放諸水漬。又數家召齋。一一同日見彥來食。

至終闍維。有巨蛇緣樹杪。投身火聚。當乎薪盡舍利散飛。或風動草木上紛紛而墜。神異絕繁。具如別錄。

梁撫州曹山本寂傳

釋本寂。姓黃氏。泉州蒲田人也。其邑唐季多衣冠士子。僑寓。儒風振起。號小稷下焉。寂少染魯風。率多強學。自爾淳粹獨凝。道性天發。年惟十九。二親始聽出家。入福州雲名山。年二十五。登於戒足。凡諸舉措。若老苾蒭。咸通之初。禪宗興盛。風起於大滬也。至如石頭藥山。其名寢頓。會洞山憫物。高其石頭。往來請益。學同洙泗。寂處眾如愚。發言若訥。後被請住臨川曹

山。參問之者。堂盈室滿。其所訓對。激射匪停。特爲毳客標準。故排五位。以銓量區域。無不盡其分齊也。復注對寒山子詩。流行寓內。蓋以寂素修舉業之優也。文辭遒麗。號富有法才焉。尋示疾。終於山。春秋六十二。僧臘三十七。弟子奉龕窆而樹塔。後南嶽玄泰著塔銘云。

後唐漳州羅漢院桂琛傳

釋桂琛。俗姓李氏。常山人也。甫作童兒。篤求遠俗。齋茹一餐。調息終日。秉心唯確。鄉黨所欽。二親愛縛而莫辭。羣從情纏而難脫。旣冠。繼踰城之武。求師得解。

虎之儔。乃事本府萬歲寺無相大師矣。初登戒地。例學毗尼。爲眾升臺宣戒本畢。將知志大安拘之於小道乎。乃自誨曰。持犯束身。非解脫也。依文作解。豈發聖乎。於是誓訪南宗。程僅萬里。初謁雲居。後詣雪峰。玄沙兩會。參訊勤恪。良以嗣緣有在。得旨於宗一大師。明暗色空。廓然無惑。密行累載。處眾韜藏。雖夜光所潛。而寶器終異。遂爲故漳牧太原王公誠請。於閩城西石山建蓮宮而止。駐錫一紀有半。來往二百眾。琛以秘重妙法。罔輕示徒。有密學懇求者。時爲開演。後龍溪爲軍倅。勤州太保瑯琊公志。請於羅漢院爲

眾宣法諱讓不獲遂開方便不數載南北參徒喪疑而往者不可殫數有角立者撫州曹山文益江州東禪休復咸傳琛旨各爲一方法眼視其子則知其父矣以天成三年戊子秋復戒閩城舊止徧翫近城梵宇已俄示疾數日安坐告終春秋六十有二僧臘四十遺戒勿遵俗禮而棺而墓於是茶毗於城西院之東岡收其舍利建塔於院之西稟遺教也則清泰二年十二月望日也琛得法密付授耳時神晏大師王氏所重以言事脅令捨玄沙嗣雪峰確乎不拔終爲晏讓而淩轡惜哉

後唐福州長慶院慧稜傳

釋慧稜。杭州海鹽人也。俗姓孫氏。初誕纏紫色胎衣。爲童。亂日。俊朗抗節。於吳苑通玄寺登戒已。聞南方有禪學。遂遊閩嶺。謁雪峰。提耳指訂。頓明本性。乃述偈云。昔時謾向迷中學。今日看來火裏冰。如是親依不下峰頂。計三十許載。冥循定業。謹攝矜莊。泉州刺史王延彬。召稜住昭慶院。禪子委輸。唯虞後至。及於長樂府。居長慶院。二十餘年。出世不減一千五百眾。稜性地慈忍。不妄許人。能反三隅。方加印可。以長興三年壬辰五月十七日長往。春秋七十九。僧臘六十。

高僧傳三集卷十三
二
閩國王氏私誄之大師。號超覺。塔葬皆出官供。判官
林文盛爲碑紀德云。

後唐杭州龍冊寺道怱傳

釋道怱。俗姓陳。永嘉人也。少總之年。性殊常準。而惡
鯉血之氣。親黨強啖以枯魚。且虞嘔噦。求出家於開
元寺。具戒已。遊閩入楚。言參問善知識。要決了生死
根源。見臨川曹山寂公。大有徵詰。若曇詢之問僧稠
也。終頓息疑於雪峰。閩中謂之小怱布納。時太原同
名年臘之高故。暨迴浙。住越州鑑清院。時皮光業者
日休之子。辭學宏贍。探蹟禪門。嘗深擊難焉。退而謂

人曰。怱公之道崇論閎議。莫臻其極。武肅王錢氏欽慕。命居天龍寺。私署順德大師。次文穆王錢氏創龍冊寺。請怱居之。吳越禪學自此而興。以天福丁酉歲八月示滅。春秋七十。茶毗於大慈山塢。收拾舍利。起塔於龍姥山前。故僧主彙征撰塔銘。今舍利院弟子主之。香火相綴焉。

晉會稽清化院全付傳

釋全付。吳郡崑山人也。幼隨父商於豫章。聞禪寂之說。乃有厭世之志。白求出家。父愠形於色。愠止復白者三。父異其誠率。略許之。遂詣江夏投清平大師。問

曰。爾來何求。付曰。志求法也。清平師憐其幼而抱器。撫以納之。夙興夜寐。殊於羣童。及長爲之落飾。尋登戒度。奉師彌謹。檢身彌至。問法無厭。飫見性不齷齪。清平領而許之。一旦謂人曰。吾聞學無常師。吾非匏瓜。豈繫於此而曠於彼乎。遂辭師而抵宜春之仰山。禮南塔涌禪師。應對言語。深認仰山之勢。頓了直下之心。南塔覲然器重之。拳拳伏膺。棲神累載。後遊於廬陵。安福縣宰楊公建應國禪院。請付居之。禪徒子來。堂室畧滿。楊宰罷任。其鄉人復於鵠湖山建院。迎以居之。廉使上聞。錫名曰清化禪院。禪徒麇至。請問。

者牆進。皆不我屈。豈多讓於前輩乎。有同里僧謂付曰。父母之鄉。胡可棄也。任緣徇世。願師歸歟。遂別。鴈湖而還故國。時吳越文穆王錢氏命升階。賜之衣衾鉢器。有加禮焉。丁酉歲。錢城戍將闢雲峰山建清化禪院。召以居之。次忠獻王錢氏遣使錫以紫袈裟。付上章累讓。再賜之。又讓之。遂故以納衣。付曰。吾非榮其賜而飾讓也。恐後人之倣吾而逞欲矣。尋賜號曰純一禪師。又固讓之。付不以情忘情。故情真。不以道求道。故道直。所居院之殿宇堂室。人競崇建之。鑄鐘千餘斤。新額曰雲峰清化禪院。雲水之侶輻湊。睠睠

高僧傳三集卷十三
不欲捨旃。開運四年丁未歲秋七月示疾。謂眾曰。生也法起。歿也法滅。起滅非言論所及也。安然而逝。有大雨疾風。以震林木拔矣。高年六十六。臘四十有五。歸窆於山之北塢。弟子應清等十餘人奉師遺訓。不墜其道焉。僧主彙征爲塔銘。建隆二年立。

晉永興永安院善靜傳

靈照

釋善靜。俗姓王氏。長安金城人也。父朗唐威州刺史。母李氏。因夢聖容。照爛金色。遂爾娠焉。及生岐嶷。殆乎知學。博通羣言。因掌書奏於神策軍。中尉器重之。忽厭浮幻。潛詣終南豐德寺禮廣度禪師。時年二十。

七也。泊乎削染受具。天復中南遊樂普。見元安禪裔。乃融心要。北還化徒於故里。結廬於終南雲居山。道俗歸之如市。又起遊峨嵋禮普賢銀色世界。迴興元。連帥王公禮重畱之。後還故鄉。已黍離矣。畱守王公營永安禪院以居之。以開運丙午歲冬。鳴椎集僧囑累。還方丈。東向右脇而化。俗壽八十九。僧臘六十。黑白之眾若喪嚴親。明年正月八日。茶毗於城南。獲舍利數千粒。漢乾祐三年庚戌八月八日。遷塔於長安義陽鄉。石塔巋然。初靜率多先覺。往遊熨道。避昭宗之蒙塵。又生平洗沐舍利隕落。皆收秘。不許弟子示。

人。又嘗禪寂次。牕外無何有白鶴馴狎於庭。若有聽法之意。靜令人驅斥之。凡此殊徵有而不有。晉昌軍府主郭公歸信焉。營構禪院。命以居之。翰林學士魚崇諒爲塔銘述德焉。次杭州龍華寺釋靈照。本高麗國人也。重譯而來。學其祖法。入乎閩越。得心於雪峰。苦志參陪。以節儉勤於眾務。號照布納焉。千眾畏服。而言語似涉島夷。性介特。以恬淡自持。初住齊雲山。次居越州鑑清院。嘗祇對副使皮光業。語不相投。被舉擯徙龍興焉。及湖州太守錢公造報慈院。請住。禪徒翕然。吳會閒僧捨三衣披五納者。不可勝計。忠獻

王錢氏造龍華寺。迎取金華梁傅翕大士靈骨。道具寘於此寺。樹塔命照住持焉。終於此寺。遷塔大慈山之峰。

周金陵清涼文益傳

釋文益。姓魯氏。餘杭人也。年甫七齡。挺然出俗。削染於新定智通院。依全偉禪伯。弱年得形。俱無作法。於越州開元寺。於時謝俗累。以拂衣出樊籠。而矯翼屬律匠希覺師。盛化其徒於鄮山育王寺。甚得持犯之趣。又遊文雅之場。覺師許命爲我門之游夏也。尋則玄機一發。襍務俱損。振錫南遊。止長慶禪師法會。已

決疑滯。更約伴西出湖湘。爾日暴雨不進。暫望西院。寄度信宿。避溪漲之患耳。遂參宣法大師。曾住漳浦。羅漢。閩人。止呼羅漢。羅漢素知益在長慶。潁脫銳意接之。唱導之由。玄沙與雪峰血脈殊異。益疑山頓摧。正路斯得。欣欣然挂囊栖止。變塗迴軌。確乎不拔。尋遊方卻抵臨川。邦伯命居崇壽。四遠之僧求益者不減千計。江南國主李氏始祖知重。迎住報恩禪院。署號淨慧。厥後微言欲絕。大夢誰醒。旣傳法而有歸。亦同凡而示滅。以周顯德五年戊午歲秋七月十七日。有恙。國主紆於方丈。問疾。閏月五日。髣髴澡身與眾。

言別加趺而盡。顏貌如生。俗年七十四。臘五十五。私諡曰大法眼塔。號無相。俾城下僧寺具威儀禮迎引。奉全身於江寧縣丹陽鄉起塔焉。益好爲文筆。特慕支湯之體。時作偈頌真讚。別形纂錄。法嗣弟子天台德韶。慧明。漳州智依。鐘山道欽。潤州光逸。吉州文遂。江南後主爲碑頌德。韓熙載撰塔銘云。

周廬山佛手巖行因傳

道潛

釋行因。不詳姓氏。鴈門人也。遊方問道於江淮。見廬山北有巖。遙望如垂手焉。手下則深邃可三五丈許。因獨棲禪觀於其中。僞唐主元宗聞之。三徵召不起。

巖中夜闌有異鹿一。臥於因之石屋之側。又錦囊鳥一。伏宿於石壁下。二物都無驚怖。因不度弟子。有鄰庵僧爲之供侍。一日小疾。謂侍僧曰。卷上簾。我去去。簾方就鉤。下牀三數步間。立屹然而化。春秋七十許。元宗命畫工寫真。而閣維收遺骨。白塔在巖背焉。初因傳禪法於襄陽鹿門山。尋爲元宗堅請於棲賢寺。開堂唱道。不及朞月。潛歸巖窟。初巖如五指。中指上有松一株。因終之日。此亦枯瘁。因有經籍之學。有問則指撻先儒得失章句。是非談論。不滯於方隅。開喻必含於教化。實得道之良士也。

系曰。凡夫捨報尸必一同也。佛則右脇果位坐亡。首
揩地者現通。身立中者彰異。其惟欲行步而化者。除
後僧會外。則因公有焉。

次錢塘慧日永明寺釋道潛。俗姓武蒲津人也。生而
強壯。容姿端雅。成立則身長七尺許。胸前黑子七點
若斗之綱魁焉。投中條山棲巖大通禪院。禮真寂禪
師爲親教也。戒檢嚴明。訥言敏行。師亡之後。誓入鴈
門五臺山。以精恪之故。躬覩文殊聖容。後諸方無定
遊處。末到臨川。見崇壽益禪師。頓明心決。次棲衢州
古寺。覽閱藏經。嘗宴坐中。見文殊現形。不覺起而作

禮。及詣杭禮阿育王塔。跪而頂戴。淚下如雨。問掌塔僧曰。舍利人不目擊。還實有否。僧曰。按傳記云。藏在內角中。望若懸鐘焉。潛疑未已。遂苦到跪禮。更無閒然。俄見舍利紅色在懸鐘之外。蠢瞶而行。潛悲喜交集。又光文大師彙征。迴然肯重。自爲檀越。請於山齋。行三七日。普賢懺。忽見徧吉御象。在塔寺三門亭下。其象鼻直枕行懺所。漢南國王錢氏命入王府受菩薩戒。造大伽藍號慧日永明。請以居之。假號曰慈化定慧禪師。別給月俸以施之。加優禮也。建隆二年辛酉九月十八日。示疾而終。入棺之際。有白光晝發。孛

李瑩然。時眾皆覩。至十月內。於龍井山茶毗。所收舍利夥多。有屠者自惟惡業。展襟就火。聚乞求。斯須獲七顆。屠家持於印氏塔中。至開寶庚午歲。天台韶禪師建石塔。緘其真骨。癸酉歲。塔頂放白光焉。

宋廬山圓通院緣德傳

釋緣德。俗姓黃。錢塘人也。父超修學儒術。而長於績畫。傳周昉佛粉本。受筆法於吳興李沼長史。德幼有出家之志。心性孤僻。而寡合。遂往天台受具。習禪法。於天龍寺道愆禪師。尋往江西問道。自雲居住廬阜。孤節高岸。實不見有所欲。江南國主李氏召入內道。

高僧傳三集卷十三
場安置。慮其不羣。別構羅漢院處之。苦求入山。請住廬山新院。乃列威儀導引焉。德且裝衣荷擔而入。然後升座對荅參問焉。其國主賜賚未嘗以表牋報謝。有國老宋齊正者。禮以師道。以開寶中卒於山院。德一生服用。熟葦袴襪而已。行杜多法。供億諸禪侶。厨無匱乏。或謂德有黃白術焉。

宋天台山德韶傳

釋德韶者。姓陳氏。縉雲人也。幼出家於本郡。登戒後。同光中尋訪名山。參見知識。屈指不勝其數。初發心於投子山和尚。後見臨川法眼禪師。重了心要。遂承

嗣焉。始入天台山建寺院道場。無幾韶大興玄沙法道。歸依者眾。漢南國王錢氏嘗理丹止。韶有先見之明。謂曰。他日爲國王當興佛法。其言信矣。遣使入山。旁午。後署大禪師號。每有言時無不符合。蘇州節使錢仁奉有疾。遣人賫香往乞願焉。乃題疏云。令公八十一。仁奉得之甚喜曰。我壽八十一也。其年八月十一日卒焉。凡多此類。韶未終之前也。華頂石崩。振驚百里。山如野燒。蔓莖果應。韶終焚舍利繁多。營塔命都僧正贊寧爲塔碑焉。高年八十二。法臘六十四。卽開寶五年壬申歲六月二十八日也。語錄大行。出第

子傳法百許人。其又興智者道場數十所。功成不宰。心地坦夷。術數尤精。利人爲上。至今江浙間。謂爲大和尚焉。

論曰。梵語禪那。華言念修也。以其觸情念而無念。終日修而無修。又云正定也。正受也。正則廓然冥而定矣。正受簡邪思。惟增徧計故。所以奢摩他。以寂靜故。三摩提。以觀如幻故。若禪那者。俱離靜幻故。始云菩薩不住此岸。不住彼岸。而度眾生。令登彼岸也。若然者。諸聖住處。旣如彼。諸聖度生。復若何。稽夫法演漢庭。疾證之名未著。風行廬阜。禪那之學始萌。佛陀什

秦擯而來。般若多晉朝而至。時遠公也。密傳坐法深
幹玄機。漸染施行。依違祖述。吳之僧會亦示有緣。俱
未分明。肆多隱秘。及乎慧文大士肇尋龍樹之宗。思
大禪翁繼傳三觀之妙。天台智者引而伸之。化導陳
隋。名題止觀。粵有中天達磨哀我羣生。知梵夾之雖
傳。爲名相之所溺。認指忘月。得魚執筌。但矜誦念以
爲功。不信已躬之是佛。是以倡言曰。吾直指人心。見
性成佛。不立文字也。此乃乘方便波羅蜜。徑直而度
免無量之迂回焉。嗟乎經有曲指。曲指則漸修也。見
性成佛者。頓悟自心。本來清淨。元無煩惱。無漏智性。

本自具足。此心卽佛畢了無異。如此修證是最上乘禪也。不立文字者。經云。不著文字。不離文字。非無文字。能如是修。不見修相也。又達磨立法。要唯二種。謂理也。行也。然則直而不迂。不速而疾。云不立文字。乃反權合道也。爾時梁武不知。魏人未重。向少林而面壁。唯慧可以神交。亦猶白雪雖歌。巴童寡和。後則臨洺牧圉。子孫終號於強秦。避狄岐邠。文武乃成其王道。可生璨。璨生信。信下分二枝。一忍。二融。融牛頭也。厥忍生秀。與能。能傳信衣。若諸侯付子孫之分器也。厥後此宗越盛焉。蔭車百輛。尼拘樹而展轉垂枝。施雨

萬方。阿耨龍而連筵布潤。當是時也。應其懸記。屬於此人。後來得道。無央數是歟。重之曰。夫禪之爲物也。其大矣哉。諸佛得之。昇等妙。雌龍得之。破障纏。率由速疾之門。無過此故。今之像末。鬪諍復生。師足旣傷。資爭未已。如聞此心是佛。便言三十二相何無。或聞一路涅槃。則曰八萬法門何在。曾不知經中發菩提心。此見佛性也。云何修菩薩行。此行布修行也。因信不及無明所迷。溺喪忘歸。何由復業。或舉經以示之。則對曰。此性宗法。或謂之曰。莫是魔說。還可焚毀否。且置而勿論。又欲棄之。又欲存之。不其惑乎。昔者于

闔諸部。謂道行經爲婆羅門書。烏荼小乘。謗大乘學。作空華外道。西乾尙爾。此何驚乎。良以六代宗師。一期舉唱。但破百年之暗。靡營一室之隙。殊不知禪有理焉。禪有行焉。脫或戒乘俱急。目足更資。行不廢而理逾明。法無偏而功兼濟。然後始可與言禪已矣。其如玄學多斥講家。目爲數寶之人。終困屢空之室。那不見經是佛言。禪是佛意。諸佛心口定不相違。施設逗根。用有時處。況以經江高國紀之名。論海總朝宗之會。毗尼一學軌範千途。授形俱築釋子之基。唱隨行淨沙門之業。擬捐三事何駕一乘。終包不足之差。

豈到轉依之地。通人不誚。豎子何知。佛事門中。不捨一法。吠聲貽責。遷怒傷人。因擊鼠以破盆。爲爭搏而噬主。自他俱有。彼我須均。縱橫盡而成一秦。氣劑和而成一味者也。今從貞觀。及於宋朝。於山選山。露須彌而出海。於羽求羽。放金翅以騰空。令其鑽仰之儔。慕此堅高之道矣。吾徒通達。無相奪倫。譬若文武。是一人之藝。不能兼者。互相非斥耳。若相推重。佛法增明。酬君王度己之恩。答我佛爲師之訓。慎之哉。慎之哉。

高僧傳三集卷第十三

終

音釋

斬渠羈切 怵方無切 崦崦衣檢切 崦崦子思切 崦崦

宣佳切 睢高峻切 抉抉一決切 芟師咸切 么

麼么於霄切 麼麼細小也 佚所臻切 鞮胡街切 瓜九人

踐獸足也 媼烏皓切 寓地主矩切 同宇天 適健秋 確

克角 輶良忍切 齒初覲切 嘔嘔烏后切 吐也 噦

齧齧於角切 齧齧急促局陜貌 領胡感切 許許 展丑忍

笑初力切 𦔁𦔁渠云切 歸止媿切 𦔁鼻墨切 鄧

貌候切 搢章移切 蠹尺尹切 蟲動也 夥合果

縣名切 也輕烟切 圉魚許切 圍者 劑和也

高僧傳三集卷第十四

宋左街天壽寺通慧大師賜紫沙門贊寧等

奉敕撰

明律篇第四之一

正傳二十人
附見五人

唐京兆西明寺道宣傳

大慈

釋道宣。姓錢氏。丹徒人也。一云長城人。其先出自廣陵太守讓之後。洎太史令樂之。撰天文集占一百卷。考諱申府君。陳吏部尚書。皆高矩令猷。周仁全行。盛德百代。君子萬年。母娠而夢月貫其懷。復夢梵僧語曰。汝所姪者。卽梁朝僧祐律師。祐則南齊剡溪隱嶽。

寺僧護也。宜從出家。崇樹釋教云。凡十二月在胎。四月八日降誕。九歲能賦。十五厭俗。誦習諸經。依智顗律師受業。洎十六落髮。所謂除結。非欲染衣。便隸日嚴道場。弱冠極力護持。專精克念。感舍利現於寶函。隋大業年中。從智首律師受具。武德中。依首習律。纔聽一徧方議修禪。顗師呵曰。夫適遐自邇。因微知章。修捨有時。功願須滿。未宜卽去律也。抑令聽二十徧已。乃坐山林。行定慧。晦迹於終南。倣掌之谷。所居乏水。神人指之。穿地尺餘。其泉迸涌。時號爲白泉寺。猛獸馴伏。每有所依。名華芬芳。奇草蔓延。隋末徙崇義。

精舍。載遷豐德寺。嘗因獨坐。護法神告曰。彼清官村。故淨業寺。地當寶勢。道可習成。聞斯卜焉。焚功德香。行般舟定。時有羣龍禮謁。若男若女。化爲人形。沙彌散心。顧盼邪視。龍赫然發怒。將搏攫之。尋追悔。吐毒井中。具陳而去。宣乃令封閉。人或潛開。往往煙上。審其神變。或送異華一匳。形似棗華。大如榆莢。香氣馥。醑數載。宛然。又供奇果。季孟梨柰。然其味甘。其色潔。非人間所遇也。門徒嘗欲舉陰事。先是潛通。以定觀根。隨病與藥。皆此類者。有處士孫思邈。嘗隱終南山。與宣相接。結林下之交。每一往來。議論終夕。時天旱。

有西域僧於昆明池結壇祈雨。詔有司備香燈供具。凡七日。池水日漲數尺。有老人夜詣宣求救。頗形倉卒之狀。曰。弟子卽昆明池龍也。時之無雨。乃天意也。非由弟子。今胡僧取利於弟子。而欺天子言祈雨。命在旦夕。乞和尚法力加護。宣曰。吾無能救爾。爾可急求孫先生。老人至思邈石室。冤訴再三。云宣律師示我。故敢相投也。邈曰。我知昆明池龍宮有仙方三十首。能示余。余乃救爾。老人曰。此方上界不許輒傳。今事急矣。固何所恪。少選捧方而至。邈曰。爾速還。無懼胡僧也。自是池水大漲。數日溢岸。胡僧術將盡矣。無

能爲也。及西明寺初就。詔宣充上座。三藏奘師至。止。詔與翻譯。又送真身往扶風。無憂王寺。遇敕令僧拜等。上啓朝宰。護法。又如此者。撰法門文記。廣宏明集。續高僧傳。三寶錄。羯磨戒疏。行事鈔。義鈔等二百二十餘卷。三衣皆紵一食唯菽。行則杖策。坐不倚牀。蚤蝨從遊。居然除受。土木自得。已亡身。嘗築一壇。俄有長眉僧談道。知者其實賓頭盧也。復三果梵僧禮壇。讚曰。自佛滅後。像法住世。興發毗尼。唯師一人也。乾封二年春。冥感天人來談律相。言鈔文輕重。儀中舛悞。皆譯之過。非師之咎。請師改正。故今所行著述。

多是重修本是也。又有天人云。曾撰祇洹圖經。計人閒紙帛一百許卷。宣苦告口占。一一抄記上下二卷。又口傳偈頌。號付囑儀十卷是也。貞觀中。曾隱沁部雲室山。人睹天童給侍左右。於西明寺夜行道足跌前階。有物扶持。履空無害。熟顧視之。乃少年也。宣遽問何人。中夜在此。少年曰。某非常人。卽毗沙門天王之子。那吒也。護法之故。擁護和尚時之久矣。宣曰。貧道修行。無事煩太子。太子威神自在。西域有可作佛事者。願爲致之。太子曰。某有佛牙寶掌。雖久。頭目猶捨敢不奉獻。俄授於宣。宣保錄供養焉。復次庭除有

一天來禮謁。謂宣曰。律師當生觀史天宮。持物一苞。云是棘林香。爾後十旬安坐而化。則乾封二年十月三日也。春秋七十二。僧臘五十二。累門人窆於壇谷石室。其後樹塔三所。高宗下詔令崇飾。圖寫宣之真相。匠韓伯通塑續之。蓋追仰道風也。宣從登戒壇。及當泥曰。其閒受法傳教弟子可千百人。其親度曰。大慈律師。授法者文綱等。其天人付授佛牙。密令文綱掌護。持去崇聖寺東塔。大和初。丞相韋公處厚建塔於西廊焉。宣之持律聲振竺乾。宣之編修美流天下。是故無畏三藏到東夏朝謁。帝問自遠而來得無勞。

乎。欲於何方休息。三藏奏曰。在天竺時。常聞西明寺。宣律師秉持第一。願往依止焉。敕允之。宣持禁堅牢。捫蝨以縣紙裏投於地。三藏曰。撲有情於地之聲也。凡諸密行。或制或遮。良可知矣。至代宗大曆二年。敕此寺三綱。如聞彼寺有大德道宣律師傳授得釋迦佛牙及肉舍利。宜卽詣右銀臺門進來。朕要觀禮。至十一年十月。敕每年內中出香一合送西明寺。故道宣律師堂爲國焚之禱祝。至懿宗咸通十年左右。街僧令霄玄暢等上表乞追贈。其年十月。敕諡曰澄照。塔曰淨光。先所居久在終南。故號南山律宗焉。天寶

元載靈昌太守李邕。會昌元年工部郎中嚴厚本。各爲碑頌德云。

系曰。律宗犯卽問心。心有虛實故。如未得道。起覆想說。則宜犯重矣。若實有天龍來至我所。而云犯重。招謗還婆羅漢同也。宣屢屢有天之使者。或送佛牙。或充給使。非宣自述也。如遣龍去孫先生所。豈自言邪。至於乾封之際。天神合沓。或寫祇洹圖經。付囑儀等。且非寓言於鬼物乎。君不見十誦律中諸比丘。尙揚言曰。連犯妄。佛言曰。連隨心想說無罪。佛世猶爾。像季嫉賢。斯何足怪也。又無畏非開元中者。貞觀顯慶

已來。莫別有無畏否。

唐京兆恆濟寺道成傳

釋道成者。不知何許人也。居於天邑。演彼律乘。戒月揚光。圓而不缺。德瓶告實。滿而不傾。當顯慶中。敷四分一宗。有同霧市。時文綱律匠。雖先依澄照大師。後習律文。乃登成之堂奧矣。又懷素著述。皆出其門。垂拱中。日照三藏譯顯識等經。天后詔名德十員。助其法化。成與明恂。嘉尚同預證義。由是聲飛神甸。位首方壇。謂之梧桐多棲鳳鳥。謂之芳沚頗秀蘭叢。門生孔多。無過此集。然不詳終所。

系曰。成公與隋蔣州道成。同號而異實。二者奚先。通曰。隋成也。精乎十誦。著述尤多。唐成也。傳乎四分。譯講偕妙。然其撰集則開悟迷淪。究其翻傳則陶甄教道。譬猶後燄靡及乎前光。似寶或慙乎真寶。互有長短。用則無遺也。

唐京師崇聖寺文綱傳

名恪

釋文綱。姓孔氏。會稽人也。曾祖範。陳都官尙書。祖禩。祠部侍郎。考頂。坐逃海避隋。擇木歸舜。貞觀始拜尙乘。直長。咸光復儒業。旁通釋教。是故綱也。植宿根。從習氣。慈母懷孕。襍食棄捐。有婆羅門僧頭陀。語其母。

曰。若此男終紹三寶。白爾每聞空中多異香。襍仙樂。及誕育之日。白鶴翔集。若臨視焉。比襁褓中。午後不受乳哺。猶堅持齋者。童齒隨師訪道。十二出家。冠年受具。精慮苦行。專念息心。藜羹糗糧。麻衣草薦。操有彝檢。口無溢言。尋詣京兆沙門道成律師。稟毗尼藏。二十五講律。三十登壇。每勤修深思。凝視反聽。淨如止水。疑若斷山。或風雨宴居。或晝夜獨得。故能吉祥在手。不捨其瓶。威德迎風。不絕於氣。出籠瘠鴈。坐致虛空。起屋下層。自然成就。唯甘露之滍口。喻利劒之傷人。慎之重之。廣矣至矣。由是八方來學。四分永流。

請益者舉袂雲臨。讚歎者發聲雷駭。久視中天作淫
雨。人有憂色。綱愍之。乃端坐思惟。卻倚屋壁。奄至中
夕。欬爾半傾。唯餘背閒嶷然山立。識者以爲得神通
因定力故。日月靈跡。幽明潛感。兆於集事。應乎遣言。
左右怪之。綱曰。夫真實無相塵色。本空正覺。圓常大
悲。湛定不可取也。是以一時法主。四朝帝師。同迦葉
之入城。遇匿王之說戒。竹園門外。別有沙彌。畢樹枝
閒。廣聞鷄鳥。所以受潤者博。入見者深。萬病已痊。獲
歡喜之藥。一心不染。解煩惱之繩。又恭承絲綸京都
翻譯。追論惠用。遠契如因。翹誠滿朝。檀施敵國。但依

布薩盡用莊嚴。累厯伽藍二十餘所。凡是塔廟各已華豐。猶且刺血書經向六百卷。登壇受具僅數千人。至苦至勤。納無我之海。不寢不食。種無生之田。長安四年。奉敕往岐州無憂王寺迎舍利。景龍二載。中宗孝和皇帝延入內道場行道。送真身舍利往無憂王寺入塔。其年於乾陵宮爲內尼受戒。復於宮中坐夏。爲二聖內尼講四分律一徧。中宗嘉尚。爲度弟子。賜什物綵帛三千匹。因奏道場靈感之事。六月七日。御札題榜爲靈感寺是也。諸寺辟頌德以隸焉。夫其左鑾宿。右上林。南臺終山。北池渭水。千門宮闕。化出雲

霄萬乘旌旗天迴原隰。先天載睿宗聖真皇帝。又於別殿請爲菩薩戒師。妃主環階侍從羅拜。兜率天上親聽法言。王舍城中普聞淨戒。恩旨賜絹三千餘匹。綱悉付常住隨事修營。或金地繚垣用增上價。或寶坊飛閣克壯全模。或講堂經樓舍利淨土。或軒廊器物廚庫園林。皆信施法財周給僧寶。方將示迷津。引覺路。濯熱火宅。拯溺毒流。而乃奄忽神遷。斯須薪盡。雖有應化何其速歟。以開元十五年八月十五日怡然長往。時春秋九十有二。其年九月四日塔於寺側焉。聞哀奔喪執紼會葬。香華幢蓋緇素華夷填城塞。

川簪雲翳景。蓋數萬人。有若法侶。京兆懷素滿意承禮。襄陽崇拔。扶風鳳林。江陵恆景。淄川名恪等百餘人。咸曰。智河舟遷法宇。棟橈而已哉。有若弟子。淮南道岸。蜀川神積。岐隴慧顓。京兆神慧。思義紹覺。律藏恆暹。崇業等五十餘人。並目以慈眼。入於度門。金棺不追灰骨。罔荅。乃請滑臺太守李邕爲碑。邕象彼馬遷。法其班氏。以二人而同傳。必百行以齊肩。不忝懷素前。不慙宣師後。李北海題品。不其韙乎。有淄州名恪。律師者。精執律範。切勤求解。嘗厠宣師法筵。躬問鈔序義。宣師親錄。隨喜靈感。壇班名於經末。又附麗

文網之門也。

唐京師恆濟寺懷素傳

賓律師

釋懷素。姓范氏。其先南陽人也。曾祖嶽。高宗朝選調爲絳州曲沃縣丞。祖徽。延州廣武縣令。父強。左武衛長史。乃爲京兆人也。母李氏夢雲雷震駭因而娠焉。誕育之辰。神光滿室。見者求占。此子貴極。當爲王者之師傅也。幼齡聰黠。器度寬然。識者曰。學必成功。才當逸格。耳聞口誦。皆謂老成。年及十歲。忽發出家之意。猛利之性。二親難沮。貞觀十九年。亥。奘三藏。方西域迴。誓求爲師。雲與龍而同物。星將月以共光。俱懸

釋氏之天。悉麗著明之象。初尋經論。不費光陰。受具已來。專攻律部。有鄴郡法礪律師。一方名器。五律宗師。迷方皆俟其指南。得路咸推其鄉導。著疏十卷。別是命家。見接素公。知成律匠。研習三載。乃見諸瑕。喟然歎曰。古人義章。未能盡善。咸亨元年。發起勇心。別述開四分律記。至上元三年丙子。歸京。奉詔住西太原寺。傍聽道成律師。講不輟緝綴。永淳元年。十軸畢功。一家新立。彈糾古疏。十有六失焉。新義半千百條也。傳翼之彪搏攫。而有知皆畏。乘風之震砢輶。而無遠不聞。所化翕然。所傳多矣。復著俱舍論疏一十五

卷遺教經疏二卷。鈔三卷。新疏拾遺鈔二十卷。四分
僧尼羯磨文兩卷。四分僧尼戒本各一卷。日誦金剛
經三十卷。講大律已疏。計五十餘徧。其餘書經畫像
不可勝數。於本寺別院忽示疾。力且薨然。告秀章曰。
余律行多缺。一報將終。時空中有天樂。瀏亮奄然而
逝。俗齡七十四。法臘五十三。塋日有鴻鶴遶塔悲鳴。
至暮方散。素所撰述。宗薩婆多。何邪。以法密部緣化
地部出。化地從有部生。故出受體以無表色也。又斥
二宗云。相部無知。則大開量中。得自取大小行也。南
山犯重。則與天神言論。是自言得上人法也。大抵素

疏出謂之新章焉。開元中高山賓律師造飾宗記以解釋之對礪舊疏也。又謂爲東西塔律宗因傳習處爲名耳。大厯中相國元公載奏成都寶園寺置戒壇傳新疏以俸錢寫疏四十本。法華經疏三十本。委寶園光翌傳行之。後元公命如淨公爲素作傳。韋南康皋作靈壇傳授毗尼新疏記。有承襲者刊名於石。其辭酋麗其翰兼美。爲蜀中口實焉。

唐光州道岸傳

釋道岸。姓唐氏。世居潁川。是爲大族。漢尙書令琳司空珍吳尙書僕射固雍州刺史彬涼鎮北將軍瑤之

後也。永嘉南度。遷於光州。衣冠人物。暉映今古。岸生而不羣。少而奇。概爰在髫鬣。有若老成。齒胄膠庠。侑齊墳典。猶恐聞見未博。藝業有遺。遂浮江淮。達洙泗。探禹穴。升孔堂。多歷年所矣。操翰林之鼓吹。游學海之波瀾。討論百家。商擢三教。乃歎曰。學古入官。紆金拾紫。儒教也。餐松餌栢。駕鶴乘龍。道教也。不出輪迴之中。俱非棧喻之義。豈若三乘妙旨。六度宏功。錙銖世閒。掌握沙界哉。遂落髮出家。洗心訪道。一音克舉。四句精通。堅修律儀。深入禪慧。夜夢迦葉來爲導師。朝閱真經。宛契冥牒。由是聲名籍甚。遠近吹噓。爲出

世之津梁。固經行之領袖。十方龍象。罔不師範焉。萬國鵷鸞。無敢訓對者。向若迴茲妙識。適彼殊途。議才必總於四科。濟世雅符於三傑。有若越中初法師者。秘藏精微。罔不明練。道高寰宇。德重丘山。岸聞善若驚。同聲相應。乘杯去楚。杖錫遊吳。雲霧一披。鐘鼓齊振。期牙合契。澄什聯芳。由是常居會稽。龍興寺焉。揚越黎庶。江淮釋子。輻輳烏合。巷少居人。罕登元禮之門。且覩公超之市。岸身遺纏。蓋心等虛空。不擇賢愚。無論貴賤。溫顏接待。善誘克勤。明鑑莫疲。洪鐘必應。皆窺天挹海。虛往實歸。其利博哉。無得稱也。時號爲

大和尚登無畏座。講木叉律。容止端嚴。辭辯清暢。連環冰釋。理窟毫分。瞻仰者皆悉由衷。聽受者得未曾有。於是高僧大士。心醉神傾。捐棄舊聞。佩服新義。江介一變其道。大行孝和皇帝。精貫白業。遊藝玄樞。聞而異焉。遣使徵召。前後數介。然始入朝。與大德數人同居內殿。帝因朝暇。躬閱清言。雖天晷屢迴。而聖威難犯。凡厥目對。靡不魂驚。皆向日趨風。滅聽收視。岸人望雖重。僧臘未高。猶淪居下筵。累隔先輩。惜帝有輪王之位。不起承迎。以吾爲舍邠之後。晏然方坐。皇帝覩其高尚。伏以尊嚴。偏賜衣鉢。特彰榮寵。因請如

來法味。屈爲菩薩戒師。親率六宮圍繞供養。仍圖畫於林光宮。御製畫讚。辭曰。戒珠皎潔。慧流清淨。身局五篇。心融入定。學綜真典。觀通實性。維持法務。綱統僧政。律藏冀兮傳芳。象教因乎光盛。比夫靈臺影像。麟閣丹青。功德義殊。師臣禮異。銓擇網管。統帥僧徒者。有司之任也。以岸盛德。廣大至行。高邈思徧。雨露特變章程。所厯都白馬中興。莊嚴薦福。罔極等寺。綱維總務。皆承敕命。深契物心。天下以爲榮。古今所未有。中宗有懷。罔極追福。因心先於長安。造薦福寺。事不時就。作者煩勞。敕岸與工部尙書張錫同典其任。

廣開方便博施慈悲。人或子來役無畱務。費約功倍。帝甚嘉之。頓邀賞錫。何閒昏曉。旣荷天澤。言酬恩地。遂還光州。度人置寺。於是祇陀苑囿。鬱起僧坊。拘鄰比。正便爲人寶。能事斯畢。夫何恨哉。江海一辭。星霜二紀。每懷成道之所。更迫鐘漏之期。遂去上京。還至本處。將申顧命。精擇門人。僧行超玄儼者。是稱上足也。克傳珠髻之寶。俾賜金口之言。右脇而臥。示其泡幻也。以開元五年歲次丁巳八月十日。滅度於會稽龍興道場。時年六十有四。海竭何依山崩安仰。天人感慟。道俗哀號。執紼衣縗。動盈萬計。弟子龍興寺慧

高僧傳三集卷十四
武寺主義海都維那道融大禹寺懷則大善寺道超
齊明寺思一雲明寺慧周洪邑寺懷瑩香嚴寺懷彥
平原寺道綱湖州大雲寺子瑀興國寺慧纂等秀稟
珪璋器承磨琢荷導蒙之力懷枯羽之恩思播芳塵
必題貞石乃請禮部侍郎姚奕爲碑紀德初岸本文
綱律師高足也及孝和所重其道克昌以江表多行
十誦律東西僧堅執罔知四分岸請帝墨敕執行南
山律宗伊宗盛於江淮閒者岸之力也

唐百濟國金山寺真表傳

釋真表者百濟人也家在金山世爲弋獵表多躋捷

弓矢最便。當開元中。逐獸之餘。憩於田畎閒。折柳條。貫蝦蟇。成弗。置於水中。擬爲食調。遂入山網捕。因逐鹿。由山北路歸家。全忘取貫。蟇歟。至明年春。獵次。聞蟇鳴。就水見去。載所貫三十許。蝦蟇猶活。表於時。歎惋。自責曰。苦哉。何爲口腹。令彼經年受苦。乃絕柳條。徐輕放縱。因發意出家。自思惟曰。我若堂下辭親室。中割愛。難離慾海。莫揭愚籠。由是逃入深山。以刀截髮。苦到懺悔。舉身撲地。志求戒法。誓願要期。彌勒菩薩授我戒法也。夜倍日功。遶旋叩搥。心心無閒。念念勤。經於七宵。詰旦見地藏菩薩。手搖金錫。爲表策。

發教發戒緣作受前方便。感斯瑞應。歎喜徧身勇猛。過前二七日滿。有大鬼現可怖相。而推表墜於巖下。身無所傷。匍匐就登石壇上。加復魔相未休。百端干緒。至第三七日質明。有吉祥鳥鳴曰。菩薩來也。乃見白雲若浸粉然。更無高下。山川平滿。成銀色世界。兜率天主透迤自在。儀衛陸離。圍遶石壇。香風華雨。且非凡世之景物焉。爾時慈氏徐步而行。至於壇所。垂手摩表頂曰。善哉大丈夫求戒如是。至於再至於三。蘇迷盧可手攘而卻。爾心終不退。乃爲授法。表身心和悅。猶如三禪。意識與樂根相應也。四萬二千福河。

常流一切功德。尋發天眼焉。慈氏躬授三法衣瓦鉢。復賜名曰眞表。又於膝下出二物。非牙非玉。乃籤檢之制也。一題曰九者。一題曰八者。各二字。付度表云。若人求戒。當先悔罪。罪福則持犯性也。更加一百八籤。籤上署百八煩惱名目。如來戒人。或九十日。或四十日。或三七日。行懺苦到精進。期滿限終。將九八二籤。參合百八者。佛前望空而擲。其籤墮地。以驗罪滅不滅之相。若百八籤飛逗四畔。唯八九二籤卓然壇心而立者。卽得上上品戒焉。若眾籤雖遠。或一二來觸九八籤。拈觀是何煩惱名。抑令前人重覆懺悔已。

正將重悔煩惱籤和九八者。擲其煩惱籤。去者名中品戒焉。若眾籤埋覆九八者。則罪不滅不得戒也。設加懺悔。過九十日得下品戒焉。慈氏重告誨云。八者新熏也。九者本有焉。囑累已。天仗既迴。山川雲霽。於是持天衣。執天鉢。猶如五夏比丘。徇道下山。草木爲其低垂覆路。殊無溪谷高下之別。飛禽驚獸馴伏步前。又聞空中唱告村落聚邑言。菩薩出山來。何不迎接。時則人民男女布髮掩泥者。脫衣覆路者。羶罽毼。鼯承足者。華細美褥填阬者。表咸曲副人情。一一迪踐。有女子提半端白氎。覆於途中。表似驚忙之色。迴

避別行。女子怪其不平等。表曰。吾非無慈不均也。適觀艷縷閒皆是狝子。吾慮傷生避其悞犯耳。原其女子本屠家。販買得此布也。自爾常有二虎左右隨行。表語之曰。吾不入郭郭。汝可導引至可修行處。則乃緩步而行。三十來里。就一山坡蹲踞於前。時則挂錫樹枝敷草端坐。四望信士不勸自來。同造伽藍號金山寺焉。後人求戒年年懺罪者絕多。今影堂中道具存焉。

系曰。表公革心變行。一日千里。果得慈氏爲授戒法。此五十受中何受邪。通曰。近上法見諦自誓也。發天

眼通是證初二果也。非諦理現觀而何。專據石壇與多子塔前自誓同也。或曰所授籤檢以驗罪滅之相。諸聖教無文。莫同諸天傳授。或魔鬼所爲。不可爲後法乎。通曰。若彰善癉惡。利益不殊。彌勒天主是天傳授。非魔必矣。諸聖教中有懺罪求徵祥。證其罪滅不滅。然其佛滅度。彌勒降閻浮。說瑜伽。豈可不爲後世法耶。十誦律云。雖非佛制。諸方爲清淨者。不得不行也。

唐安州十力寺秀律師傳

釋秀公者。齊安人也。髫年天然有離俗之意焉。旣丁

茶蓼。便往蜀郡禮興律師。諷誦經典易若溫尋。又依之進具。果通達毗尼。乃爲興公傳律上足弟子歟。如是四載。入長安造宣律師門爲依止之客。勤以忘勞。涉十六年不離函丈。窮幽諸部陶練數家。將首疏爲宗本。然向黃州報所生地。次往安陸大揚講訓。聲美所聞。諸王牧守攸共遵承。正化緇徒咸慕細行。有貞固律師居於上席。解冠諸生最顯清名。餘皆後殿。其諸成業不可勝算。春秋七十餘。卒於十力寺本房焉。

唐京師崇聖寺靈粵傳

釋靈粵者。不知何許人也。勤乎切問。靡憚尋師。乾封

中於西明寺躬預南山宣師法席。然其不拘常所。或近文綱。或親大慈。皆求益也。末塗懼失宣意。隨講收采所聞。號之曰記。以解刪補鈔也。若然者。推究造義章之始。唯慈與粦也。又別撰輕重訣。故苑陵玄冑親覩其文。故援引之。以解量處輕重儀焉。金革之故。其訣湮滅。無復可尋矣。

唐京兆崇福寺滿意傳

釋滿意。不知何許人也。風神峭拔。識量寬和。經論旁通。專於律學。武德末。所遇鄴都法礪律師。作疏解曇無德律。遂往摳衣。明其授受。如是講導三十許年。乃

傳付觀音寺大亮律師亮方授越州曇一。盛化之間。出龍象之資。無過意之門也矣。

唐京兆西明寺崇業傳

釋崇業。不知何許人也。初同弋陽道岸。學毗尼於文綱之法集。業之服勤淬礪罔怠。黌肆之間推居元長。與淄州名恪齊名。挺拔剛毅過之。美聲洋洋達於禁闥。睿宗聖真皇帝操心履道。敕以舊邸造安國寺。有詔業入承明熏修別殿。爲帝授菩薩戒。施物優渥。僉迴捨修菩提寺殿宇。抑由先不畜盈長之故也。開元中微疾。囑弟子曰。吾化窮數盡。汝曹堅以防川。無令

放逸。語訖終於所居寺之別院。業卽南山之嗣孫矣。

唐越州法華山寺玄儼傳

融濟

釋玄儼。俗姓徐氏。晉室南遷。因官諸暨。遂爲縣族。年始十二。辭親從師。事富春僧暉。證聖元年。恩制度人。始墮僧數。隸懸溜寺。儼幼而明敏。長則韶令。標格峻整。風儀凜然。迨於弱冠。乃從光州岸師。諮受具戒。後乃遊詣上京。探蹟律範。遇崇福意律師。并融濟律師。皆名匠一方。南山上足。咸能昇堂睹奧。其所印可。由是道尊戒潔。名動京師。安國授記。並充大德。後還江左。徧行四分。因著輔篇記十卷。羯磨述章三篇。至今

僧徒遠近傳寫。初光州岸公嘗因假寐。忽夢神僧謂
曰。玄儼當爲法器。云何教以小乘。後乃命宣般若。由
是研精覃思。採摭舊學。撰金剛義疏七卷。古德所不
解。先達所未詳。我則發揮光明。若指諸掌。誓以一生
宣講百徧。越邑精舍時稱法華。晉沙門曇翼曾結菴
山巔。入是法三昧。感徧古菩薩。徒觀其塔。類多寶涌
出。以證經宮。如轉輪飛行而聽法。雙鳥所以示兆。今
尙翔鳴。六象所以呈奇。時猶隱現。不可得而思議者。
蓋斯之謂歟。信如來之福庭。是菩薩之隱岳。儼乃考
盤。是卜束鉢深棲。建置戒壇。招集律行。若夫秦衡上

士燕代高僧。數若稻麻。算同行輩。伏膺請益。躡屣擔簦。宴坐不出。幾三十載。開元二十四年。帝親注金剛般若經。詔頒天下。普令宣講。都督河南元彥沖躬請。儼重光聖日。遂闡揚幽贊。允合天心。令盲者見日月之光。聾者聞雷霆之響。儼之演暢。蓋有力焉。夫樂小法者。迷自我而爲病。通大方者。懵開空之法道。若夫會三歸一。觸理冥事。自優波離已下。猶或病諸。而儼綱紀小乘。演暢大法。晤佛境之非有。識魔界之爲空。故能使涅槃將生死一如。煩惱與菩提齊致。發心而登佛地。非我而誰。白黑歸依。當仁不讓。昔僧護法師。

常居石城宴坐青壁。仰其中峰如有佛像。願造十丈以圖兜率。良願未諧。護公長逝。梁武帝詔僧祐律師馳傳經理。規模刻劃。意匠纔施。俄而山冢萃崩。全身坐現。合高百餘尺。雖金石絲竹。四天之供。施常聞功德莊嚴。十地之瑠鑄。尙闕儼乃內傾。衣鉢外率。檀那布以黃金之色。鎔以白銀之相。銅錫鉛錯。球琳琅玕。七寶由是渾成。八珍於焉具足。雖寶積獻蓋。界現三千。迦葉貢衣。金踰十萬。如須彌之現於大海。若杲日之出於高山。此又儼之功德不可思議者也。故洛州刺史徐嶠。工部尙書徐安貞。咸以宗室設道友之

禮國子司業康希銑。太子賓客賀知章。朝散大夫杭
州臨安縣令朱元春。亦以鄉曲具法朋之契。開元二
十六載。恩制度人。採訪使潤州刺史齊澣。越州都督
景誠。採訪盧見義。泗州刺史王弼。無不停旟淨境。稟
承法訓。齊公乃方舟結乘。奉迎儼於丹陽。餘杭吳興
諸郡。令新度釋子躬授具戒。自廣陵迄於信安。地方
千里。道俗受法者。殆出萬人。凡禮佛名經一百徧。設
無遮大會十筵。而入境住持。舉無與比。夫秉法傳授。
從佛口生。有門人法華曇俊。崇默龍興。崇一開元。智
符稱心。崇義香嚴。懷節寶林。洪霈覺引。灌頂。皆不傾。

油鉢無漏浮囊。經不云乎。如旃檀林。旃檀圍遶。如師子王師子圍遶。信儼之威神有在。而法主之功德不刊。將知三界無安。百靈共盡。此生已適於後息。他世應見於前心。以天寶元載歲次壬午。緣化已畢。十一月三日。現疾於繩牀。七日午時。坐終於戒壇院。春秋六十有八。粵其月二十五日。窆於寺南秦山之下。高樹雙塔。光明踰於白雲。列植千松。秀色羅於明月。經始則神邕崇曉。住持則唯湛道昭。並躬護聖場。親傳智印。其餘三千門人五百弟子。承般若之深法。受毗尼之密行。盡號顓門。無待彌勒。天寶十五載歲次景

高僧傳三集卷一四
申。萬齊融述頌德碑焉。

唐杭州靈智寺德秀傳

釋德秀。俗姓孫氏。富陽人也。少出塵區。早棲梵宇。當圓戒檢正。護浮囊。匪定常師。畱神律府。講談之外。嘗哀鬼神乏食。恆以深更施其飲食。浙汭之民。傾誠畏服。及終於定山。頗多靈異。則天寶初載也。遷神座入塔時。天降舍利七顆。門人以瓶盛之。緘於其塔。或發之。見秀齒上生舍利。紛紛而墜。後人還累甃成浮圖。鄉人云。恆有白蛇蟠屈守塔。樵牧之童。無敢近者。

唐開業寺愛同傳

通玄

釋愛同。俗姓趙氏。本天水人也。代襲冠冕。弱齡挺拔。惠然肯來。爲佛家子。具戒後。講彌沙塞律。遠近師稟。若鱗羽宗。平鯤鳳也。昔南宋朝。罽賓三藏覺壽。譯成此律。因出羯磨一卷。時運遷移。其本零落。尋求不獲。學者無依。同遂於大律之內。抄出羯磨一卷。彼宗學者。盛傳流布。被事方全。孝和之世。神龍中。盛重翻宣。同與文綱等。參預譯場。推爲證義。義淨所出之經。同有力焉。著五分律疏十卷。復遺囑西明寺玄通律師。重施潤色。後安史俶擾。焚燎喪寺。今無類矣。

唐五臺山詮律師傳

釋詮律師者。五臺縣人也。綵服出家。冠年受戒。儀則清雅。眾稟綱繩。習毗尼宗。秘菩薩行。詮除訓徒。外守默無撓。遠近有事。靡不豫知。人謂爲得他心通也。一食終日。弊衣遮體。不貯顆粒。房無縷綜。其強本節用。造次不可及也。入滅之日。祥雲鬱密。天樂錚鏦。闔寺僧徒。皆聞異香。紛馥乃召集寺眾。執手告辭。囑累門人。加趺而滅云。

唐揚州龍興寺法慎傳

釋法慎。姓郭氏。江都人也。孩抱之歲。誓齒空門。親愛所鍾。志不可奪。從瑤臺成律師受具戒。依太原寺東

塔體解律文絕其所疑。時賢推服。或一言曲分於象
表。精理自得於環中。聲振京師。如晞愛日。諸寺眾請
綱領。乃默然而東歸。旣還。揚都俯允。郡願恆誦金剛
般若經。如意輪。般若佛心。我得此心。眾生亦得。如意
勝願。我如此願。眾生亦如。謂天台止觀。包一切經義。
東山法門。是一切佛乘。色空兩亡。定慧雙照。不可得
而稱也。慎暑不攝齋。食不求飽。居不易坐。四方捨施。
歸於大眾。一身有無。均於最下。朝廷之士。銜命往還。
路出維揚。終歲百數。不踐門閭。以爲大羞。仰承一盼。
如洗飢渴。慎與人子言。依於孝。與人臣言。依於忠。與

人上言依於仁。與人下言依於禮。佛教儒行合而爲一。學者流誤。故親校經論。延來者聽受。故大起僧坊。將警羣迷。故廣圖菩薩因地。善護諸命。故曲濟眾生。壽量以文字度人。故工於翰墨。以法皆佛法。故兼采儒流。以我慢爲防。故自負衣鉢。以規矩爲任。故綱正緇林。以發揮道宗。故上行恭禮。以感慕遺迹。故不遠他邦。以龍象參議。故再至京國。以軌度端明。故研精律部。歟。黃門侍郎盧藏用。才高名重。罕於推挹。一見於慎。慕味循環。不能離坐。退而歎曰。宇宙之內。信有高人。黃門於院中。置以經藏。嚴以香燈。天地無疆。像

法常在太子少保陸象先。兵部尚書畢構少府監陸
餘慶。吏部侍郎嚴挺之。河南尹崔希逸。太尉房琯。中
書侍郎平章事崔渙。禮部尚書李愷。辭人王昌齡著
作郎綦母潛。僉所瞻奉。願同灑掃。感動朝宰如此。以
天寶七載十月十四日晨興盥漱。就胡牀加趺。心奉
西方。旣曛而滅。於龍興寺別院。春秋八十三。夏六十
二。緇素弟子北距泗沂南踰嶺徼。望哭者千族。會葬
者萬人。其上首曰。會稽曇一。閩僧懷一。南康崇叡。晉
陵義宣。錢塘譚山寺惠鸞。洛京法瑜。崇元鶴林寺法
勵。法海。維揚惠凝。明幽靈祐。靈一等。罔不成樂說辯。

才入法華三昧。眾所知識物之依怙。天上甘露正味。
調柔。人中象王利根成熟。音樂樹下長流福慧之泉。
雪山峯頂。仰見清涼之月。金剛決定煩惱無餘。優曇
開敷。香潔盈滿。法施之恩。郡居之感。哀奉色身。經始
靈塔。於蕪城西蜀岡之原。像教也。幽公自幼及衰。恆
所親侍。後請吏部員外郎趙郡李華爲碑紀述。大厯
八年癸丑十二月也。大理司直張從申書。趙郡李陽
冰題額。其塔亦幽公經度。建塔之地。廣袤如素。高卑
得中。周臨四衢。平視千里。門人環蒔。列栢薦以名香。
其塔屬會昌中。例皆毀焉。

唐杭州華嚴寺道光傳

釋道光。姓褚氏。踰巖出家。方冠受具。詣光州和尚學通毗尼。於時夏淺。德崇壇場。屬望蓋天。賚真士爲東南義虎。雲雨慈味。笙鏞道聲。光持法華。經創塔廟。泊沒身不怠也。上元元年。庚子仲秋。示疾。終於本寺。春秋七十九。法臘五十八。是日。馳陽昧昧。淫雨溼溼。烈風崇朝。嘉木爲折。乃東土福盡之徵也。俄然喜氣五色。亭亭如蓋。移晷不散。徧映精廬。卽西方往生之意也。初光未歿。其月三日。質明。支疾凝神。依色身觀彌陀具相。現在其前。滿庭碧華。昔所未覩者。四日。味爽。

有異人請光爲和尚。遂開目彈指曰。但發菩提心。至五日。曼陀羅華自天而雨。門人神烈義津。追慕弗遑。各分法味。流布行化。香火無窮云。

唐揚州大雲寺鑒真傳

釋鑒真。姓淳于氏。廣陵江陽縣人也。總丱俊明器度。宏博能典謁矣。隨父入大雲寺。見佛像。感動夙心。因白父求出家。父奇其志許焉。登便就智滿禪師。循其獎訓。屬天后長安元年。詔於天下度僧。乃爲息慈。配住本寺。後改爲龍興。殆中宗孝和帝神龍元年。從道岸律師受菩薩戒。景龍元年。詣長安。至二年三月二

十八日於實際寺依荊州恆景律師邊得戒。雖新發意有老成風。觀光兩京名師陶誘。三藏教法數稔該通。動必研幾。曾無矜伐。言旋淮海。以戒律化誘。鬱爲一方宗首。冰池印月。適足清明。猊座揚音。良多響答。時日本國有沙門榮叡。普照等。東來募法。用補缺然。於開元年中。達於揚州。爰來請問。禮真足曰。我國在海之中。不知距齊州幾千萬里。雖有法而無傳法人。譬猶終夜有求於幽室。非燭何見乎。願師可能輟此方之利樂。爲海東之導師乎。真觀其所以察其翹勤。乃問之曰。昔聞南岳思禪師生。彼爲國王。興隆佛法。

是乎。又聞彼國長屋曾造千袈裟來施中華名德。復於衣緣繡偈云。山川異域風月同天。寄諸佛子共結來緣。以此思之。誠是佛法有緣之地也。默許行焉。所言長屋者。則相國也。真乃慕比丘思託等一十四人。買舟至廣陵。賈經律法離岸。乃天寶二載六月也。至越州浦。止署風山。真夜夢甚靈異。纔出洋遇惡風濤。舟人顧其垂沒。有投棄棧香木者。聞空中聲云。勿投棄。時見舳艫各有神將介甲操仗焉。尋時風定。俄漂入蛇海。其蛇長三丈餘。色若錦文。後入魚海。魚長尺餘。飛滿空中。次一洋純見飛鳥。集於舟背。壓之幾沒。

泊出鳥海乏水。俄泊一島。池且泓澄。人飲甘美。相次達於日本。其國王歡喜迎入。城大寺安止。初於盧遮那殿前立壇。爲國王授菩薩戒。次夫人王子等。然後敎本土有德沙門足滿十員。度沙彌澄修等四百人。用白四羯磨法也。又有王子一品親田捨宅造寺。號招提。施水田一百頃。自是已來長敷律藏。受敎者多。彼國號大和尚。傳戒律之始祖也。以日本天平寶字七年癸卯歲五月五日無疾辭眾坐亡。身不傾壞。乃唐代宗廣德元年矣。春秋七十七。至今其身不施竺漆。國王貴人信士時將寶香塗之。僧思託著東征傳。

詳述焉。

唐杭州天竺山靈隱寺守直傳。守直字堅道。錢塘人也。姓范氏。齊信安太守瑄之八葉。禮旣冠。眾君子器之。夙有止園之期。不顧玄纁之錫。遂詣蘇州支硎寺圓大師所受具足律儀。是夜眼中光現。長一丈餘。持久方滅。蓋得戒之驗也。後抵江陵。依真公。三年練行。尋禮天下二百餘郡。聖跡所至。無不至焉。見無畏三藏爲受菩薩戒。聞普寂大師傳。稜伽心印。講起信宗論二十餘徧。南山律鈔四十徧。平等一雨。大小雙機。在乎圓音。未嘗少異。乃立願。

誦華嚴經。還於中宵夢神人施珠一顆。及覺惘惘然。如珠在握。是歲入五臺山。轉華嚴經二百徧。追夙心也。宏覽大藏經三過。廣正見也。至開元二十六年。有制舉高行道俗。請正名隸大林寺。後移籍天竺住靈隱峰。時大厯二年也。至五年三月。寓於龍興淨土院。謂左右曰。夫至人乘如而來。乘如而去。示其心然也。而愚夫欲以長繩繫彼白日。安可得乎。吾景落桑榆。豈淹久也。以其年此月二十九日告終。春秋七十一。僧臘四十五。其閒臨壇度人多矣。顯名者。洞庭辯秀。湖州皎然。惠普道莊。會稽清江清源。杭州擇鄰神偃。

常州道進晝公著塔銘云。

唐洪州大明寺嚴峻傳

釋嚴峻。姓樊氏。濰州人也。父任硤州長史。昭王府司馬。峻性地夷然。學習明利。年及十九。應進士舉。倏罹荼蓼。思報劬勞。投南陽佛寺。後抵荊州玉泉山蘭若。遇真禪師。示其禪觀。入城泊大雲寺。峻秉持戒印。用之不刊。憑附浮囊。渡之攸往。眾請臨壇。復舉律之宗主。僂俛承命。忽逢觀淨禪師。頓明心法。大厯元年。思往清涼山。未達廬陵。見顏魯公。一言相契。膠漆如也。二年春。宜春太守俾僧正馳疏請召。四年春。洪州刺

史李華員外延入大明寺住止。三月中俄命沐浴換衣。舉望空虛。合掌而逝。春秋五十九。遷塔。弟子圓約等於寺前大泉池立碑存焉。

唐會稽開元寺曇一傳

釋曇一。姓張氏。蓋韓人也。其先軒轅賦。姓至良。佐漢侯於畱。魏晉已還。衣冠繼代。曾祖恆。隋太常卿。扈蹕揚都。遂家於越。恆生孝廉翼。翼生處士葳。葳生一。令聞江南。今四葉矣。一宿植淨因。生知慧性。弱而敏悟。長而聰明。年十五。從李洎先生習詩禮。終日不違。十六。聽雲門寺茂亮法師經論。一聞懸解。法師異之。謂

其母孟氏曰。此佛子也。可令削髮。當與授記。亮卽孝和皇帝菩薩戒師也。一聞而歡喜。有度世之志。景龍中。承恩出家。隸在僧錄。年滿。受具於丹陽玄昶律師。學通事鈔於當陽曇勝律師。旣而鑽木見煙。窺牆覩奧。開元五年。西遊長安。依觀音寺大亮律師。傳毗尼藏。崇聖寺檀子法師。學唯識。俱舍等論。安國寺印度沙門。受菩薩戒。於是蓮華不染之義。甘露甚深之旨。一傳慧炬了作梵雄。遠近瞻仰如宗師矣。然刃有餘地。時兼外學。常問周易於左常侍褚無量。論史記於國子司業馬貞。遂漁獵百氏。囊括六籍。增廣聞見。自

是儒家。調御人天。皆因佛事。公卿嚮慕京師。籍甚時。丞相燕國公張說。廣平宋璟。尚書蘇瓌。兗國陸象先。秘書監賀知章。宣州涇縣令萬齊融。皆以同聲並爲師友。雖支許之會。虛嘉宗雷之集。廬岳未云多也。四分律者。後秦三藏法師梵僧佛陀耶舍傳誦中華。與羅什法師共爲翻譯。今之講授。自此員來。魏法聰律師始爲演說。聰授道覆。覆授光。洎隋朝相部勵律師作疏十卷。西京崇福寺滿意律師盛傳此疏。付授亮律師。其所傳授。一一依勵律師疏。及唐初終南宣律師四分律鈔三卷。詳略同異。自著發正義記十卷。明

兩宗之踳駁。發五部之鈐鍵。後學開悟。夜行得燭。前疑泮釋。陽和解冰。佛日照晰而再中。法棟崢嶸以高峙。發正記中。斥破南山。持犯中可見也。二十五年。仗錫東歸。明年詔置開元寺。長史張楚舉爲寺主。因而居焉。一聲振京華。道高吳會。布大慈以攝眾。修萬行以表儀。順風問道者。轂擊肩摩。函丈請益者。波委雲萃。虛受之量。隨而演說。故前後講四分律三十五徧。刪補鈔二十餘徧焉。江淮釋子受木叉者。非一登壇。卽不爲得法。從持僧律。蓋度人十萬計矣。至德之際。國步多艱。緇徒慢法。罕率經教。國相王公出鎮於越。

以一德名素高。請爲僧統。一變清淨大闡熏修。浹旬之閒。迴邪入正。善誘潛化。皆此類焉。始者一入關謁明達法師。目之曰。汝人中師子也。又遇遵善寺尼慈和。歌曰。曇一師。解毗尼。大聰明。更無疑。爲達人之所諺多矣。天寶十四載。淞河潮水南激錢塘。大雲伽藍當茲湍淦。因請一講律。學徒千人咸發大願。每上念摩訶般若。乃止。濤激以福。伍胥龍王。用茲莊嚴。祈於衛護。五月晦夜。惚恍之閒。見一神人。衣冠甚偉。稽首謝曰。蒙垂法施。卽改波流。未逾九十日。漲沙五十里。道俗驚歎。得未曾有。一蔚爲法主。大揚教跡。發明前

佛之付囑。保證後佛之護念。四句作偈。受持者了於未了。一音演法。諦聽者聞所不聞。非夫天地涸精。江山粹靈。與法作程。閒世而生。孰能玄通密證。如此其大者乎。寺中洪鐘一所作也。遠徵鳧氏。近法雷門。生存累年。匠其規制。歿後三日。成於鎔造。聲應百里。扛乎萬鈞。蒲牢叫而地震。師子吼而山業。警悟聾俗。導引迷方。胡可言也。法謝形離。薪盡火滅。以大曆六年十一月十七日。遷化於寺之律院。報齡八十。僧臘六十一。卽以明年十一月二十四日。遷座於秦望山。從先和尚之塋也。一春秋已高。精爽逾勵。旣不衰憊。初

無疾苦。忽謂侍者曰。吾將掃禮墳塔歸骨於此。數日之後奄然而終。江淮之南河洛之表。衣纓制服執紼送喪。號哭滿山旛華蔽野。比夫劇孟之母送車千乘。孔丘之墓栽樹萬株。可同年哉。門人越州妙喜寺常照。建法寺清源。湖州龍興寺神玩。宣州隱靜寺道昂。杭州龍興寺義賓。台州國清寺湛然。蘇州開元寺辯秀。潤州棲霞寺昭亮。常州龍興寺法俊等。早發童蒙。咸承訓誘。三千弟子仰梁木而增悲。八萬門人望梅檀而不及。時會稽徐公浩素敦鄉里之舊。爲碑頌德焉。大曆十一年也。

[illegible]

